

15 STI' DICIEMBRE 2011

TORRÉ STI' NI RAPA NI CANÍ' DE REINU STI' JIOBÁ

REVISTA NI CHIGUIUUNDA'

CA TEMA NI CHIGUIUUNDA':

30 sti' enero—5 sti' febrero

Chinándanu ejemplu galán stibe
ne cadí gúninu ca cosa malu bí'nibe

YAZA 8 DIIDXA' RIUUNDA': 61, 57

6-12 sti' febrero

Xiñee naquiiñe' chinándanu
ni na espíritu sti' Dios

YAZA 13 DIIDXA' RIUUNDA': 71, 63

13-19 sti' febrero

Ca xpinni Dios ni bibani dxiqué
bí'nica' ni na espíritu stibe

YAZA 18 DIIDXA' RIUUNDA': 81, 51

20-26 sti' febrero

Cani bí'ní' ni na espíritu sti' Dios
lu primé siglu ne cani cayuni ni yanna

YAZA 22 DIIDXA' RIUUNDA': 69, 122



REVISTA TORRE STI' NI RAPA ri' rireeni para gusisácani Jibobá, Dios ni jma nandxó' guibá' ne lu guidubi naca Guidxilayú. Dxiqué guyuu caadxi torre, dede ra gunda bí'yacabe xi cayaca sti lugar nuu zitu. Ngaca nga ni runi revista ri', purti' racaneni laanu gánnanu ximodo cayaca ni na ca diidxa' riguixhená zeeda lu Biblia ca tiempu stinu. Revista *Torre sti' ni rapa* ri' riguixhedxini ladxidó' binni purti' rusiidini ma' cayuni mandar Reiu stí' Dios dede guibá' ne zunitiluni guirá'ca cosa malu nuu yanna ri' ne zúnini Guidxilayú ri' ti paraísu. Jesús guti para ganda gapa binni guendanabani ni qué zaluxe ne laabe nga Rey ni cayuni mandar lu Reiu stí' Dios. Revista ri' racaneni binni gapa fe Jesucristu. Ca testigu stí' Jibobá rúnica' revista ri'dede izá 1879, ne qué huasaana de gácani dede izá ca. Cadi ti revista ni cuzeete'de política ni, sínueque lu Biblia nga riree guirá' ni rusiidini.

Revista *Torre sti' ni rapa* ri' rireeni lu guidubi naca Guidxilayú para gusiidini binni de Biblia, ne para gaca dxiiñá' ca riquiñé' bueltu ni rudii binni bia' ná' ladxidó'. Cadi naquiiñé' guidoo ni. Pa cadi cá gadxé la? ca textu ri' bireecani lu *Stídxo Dios Didkazá* o lu *Traducción del Nuevo Mundo de las Santas Escrituras (con referencias)* [NM].

NI CHIGUSIIDI' CATEMA RI' LAANU

PRIMÉ TEMA CA ZEEDANI LU YAZA 8-12

Lu Biblia rieete'de caadxi binni ni bisaana ti ejemplo sicarú para chinándanu, Peru laaca bí'nica' cosa malu ni cadi naquiiñé' gúrinu. Salomón nga tobi de ca binni ca. Tema ri' zacané laanu para guidú'yanu xi zanda guizidinu de ejemplo stibe.

GUIROPA TEMA CA ZEEDANI LU YAZA 13-17

Guibá' ne lu guidubi Guidxilayú nuu ti stipa nabé nadipa' ni zanda gului' laanu ximodo jma jneza sanu ndaani' guidxilayú malu ri'. Xi stipa ndi' caninu ya'. Xiñee naquiiñé' guidu'nu lugar gului'ni laanu xi gúrinu. Ximodo zanda cueendunu stale cosa galán de laani.

GUIONNA NE GUIDAPA TEMA ZEEDACANI LU YAZA 18-26

Lu ca tema ri' zadú'yanu bidii Jibobá stipa stí'stale de ca xpinni ni bibani dxique. Ximodo gucané espíritu santu laacabe ya'. Ra guidú'yanu modo bilu' Jibobá laacabe xi naquiiñé' gúnicabe, zaguuni gana laanu para gúnirunu xhiiñá' Dios.

XCAADXI TEMA

3 Huacaa' ndaaya' purti' rune' intica dxiiñá' rudii xquidxi Dios naa



- 27 Cadi gusaana de chu'lú' nayeche' ▲
purti' si huaralu'
- 31 Rietenala'dxu' la?
- 32 Ca tema ni huaree lu
Torre sti' ni rapa izá 2011

HUACAA' NDAAYA' PURTI' RUNE' INTIICA DXIIÑA' RUDII XQUIDXI DIOS NAA

JAMES A. THOMPSON
GUNÍ' NI BIZAACA



Gule' ladu guete' sti' Estados Unidos lu iza 1928. Iza que nuu caadxi ley ni qué rudii lugar guibani ca hueru ne ca negru tobi si. Cani qué na' chinanda ley que ruseguyoocabe laaca'o nabé naná modo rusabanácabe laaca'.

TIEMPU que, ca testigu sti' Jiobá ni nuu caadxi lugar de Estados Unidos, gúpacá' neza binni ridagulisaar ra rié ca hueru ne ra rié ca negru. Ne ora gápacabe guendaridagulisaar de chupa gubidxa o de chonna gubidxa la? cada raza rié ra raca caber laa. Lu iza 1937, beeda gaca bixhoze' binnigola ni zaniru' lade ca binni ridagulisaar (yanna lácabé binnigola ni ruuya' dxiiña' ni runi grupu

*Nabé galán ejemplu bidii bixhoze'
ne Nichols naa*



de binnigola) ra rié puru si binni negru ni nuu Chattanooga (Tennessee). Ne Henry Nichols naca binnigola ni zaniru' lade ca binni ridagulisaar ra rié puru si binni hueru.

Nabé rieche' ora guietenala'dxe' ca dxi guca' ba'du'. Ribieniá' bixhoze' ne Nichols ra puerta' li-dxe' ne ma'cucaadiaga' laacabe ora ma'caní'cabe. Necá qué riene' guirá' ni riní'cabe, riululadxe' chua'a gaxha de bixhoze' ne gucaadiaga' ora ma' caní'cabe ximodo jma galán gucheechecabe dii-dxa' pur modo nabánidu tiempu que.

Caadxi iza ante, lu 1930, bizaaca familia studi ti desgracia. Guti jñaa'dxi deru' napa 20 iza. Ngue runi, biaanané bixhoze' naa dxi napa' chupa iza, ne bizana' Doris napa tapa iza. Necá cadi xadxi-pe' de guyuunísabe, peru nabé ma' biniisibe lu stiidxa' Dios.

Caadxi ejemplu sicarú ni gucané naa

Lu iza 1933, binibiá' bixhoze' ti ba'dudxaapa' sicarú ni naca Testigu ni lá' Lillie Mae Gwendolyn Thomas, ne qué nindaa bichaganabe laa. Guirópacabe bí'nicabe ni na Jiobá, ngue runi gúcacabe ti ejemplu sicarú para naa de para Doris.

Lu iza 1938 bidxaa modo ribícabe binni para gaca binnigola ndaani' xquidxi Dios. Ma' cadi ca binni ni nuu ra ridagulisaacabe nga guin' tu

gaca binnigola, sínuque oficina ni nuu Brooklyn (Nueva York) nga guiní' tu guicaa dxiiña' ca. Caadxi de ca binni ni nuu Chattanooga qué ñuulá-dxica' ni gudixhe xquidxi Dios gaca, pero bixhoze' guyuula'dxi' modo nácabé gácani ne bíf'nibe ni de guidubi ladxido'be. Modo bizuubabe stiidxa' Dios ne modo gucané jñaa' laabe, cayacané cani naa dede nagasi.

Guyuaanisa' ne guca' precursor

Lu iza 1940, caadxi de ca binni ni nuu ra ridagulisaadu gudíxecabe ti autobús para chiné laadu ra chigaca ti guendaridagulisa Detroit (Michigan). Raqué guyuunisa chupa chonna de cani ze' lu grupu stidu. Nuu tu gunabadiidxa' naa xiñee qué ñuaanisa' raqué, purti' dede dxi napa' gaayu' iza ma' rucheeche' diidxa' ne qué huasaña de gune' ni.

Ora gunabadiidxacabe naa xiñee, gudxe' laacabe qué riene chaahue' xi guirá' nga riní' chúnsa binni. Bidxagaya bixhoze' ni bicabe' óraque, ne dede dxiqué gucuá íquebe gacanebe naa guiene' xi riní' chúnsa binni ne pabiá' risaca gune' ni. Gudi'dí' si tapa bee, 1 sti' octubre 1940, guluunísacabe naa ndaaní' ti tanque ra da' nisa nanda gríriá guidxi Chattanooga.

Dxi ma' napa' catorce iza, cada biaje guicaa vacación ra scuela raca' precursor. Rucheeche' diidxa' ndaaní' ca guidxihuiini' ni nuu Tennessee ne Georgia, estadu ni dxaagani. Riasi' tempranu, rune' ni gahua' galaa dxi ne a las seis siadó' riguibá' ndaaní' tren o autobús ni chiné naa ra chigucheche' diidxa'. Ribigueta' bia' las seis huadxi. Guendaró ni riniá' que rirá ni ante ganda galaa dxi, ne xcadxi hora que ma' candaana'. Necá napa' bueltu para sie' ni gahua' qué randa riziee' ni, purti' qué rinácabe chu' negru ndaaní' ca tienda que. Ti dxi gucala'dxe' nizié' ti ñebe pero gúdxicabe naa guiree de raqué. Galán nga beeda ti gunaa huera guca nacha'hui' né naa, guzí' ti ñebe ne bedané ni ra nuaa'.

Dxi bizuluá' secundaria, ca binni ni nabeza ndaaní' ca estadu ni nuu ladu guete' bizulú bicaalu' para gaca respetar derechu sticá'. Grupu casi NAACP (Asociación Nacional para el Progreso de las Personas de Color) bicaacabe stale de cani canazá scuela gucaalucá' pur ca derechu sticá' ne

laaca gúdxicabe laadu chu'du ládecabe. Stale de ca scuela ra rié puru si binni negru ne ra riaa' la? guní'cabe naquiiñe'chu'guirá' cani canazá scuela lu ca grupu que. Bicaacabe naa chuaa' pur ca binni de raza stinne', pero qué nina'yá'. Bisiene' laacabe qué ruisaca Dios ti raza jma que sti raza, ne rune' cré zuni chaahui' Dios guirá' ca cosa ni cadi jneza cayaca que (Juan 17:14; Hech. 10: 34, 35).


Cadi xadxí de biluxé' secundaria yebiee' ndaañí' guidxi Nueva York. Dxi ziaa' raqué biaana' chupa chonna gubidxa Filadelfia (Pensilvania) para chiganna' caadxi xhamigua' ni binebia'ya' lu ti guendaridagulisa. Neza binni ridagulisa ra nuu ca xhamigua' que rié binni negru ne hueru. Ca dxi nuaa' raqué beeda ganna binnigola ni riganna ca neza binni ridagulisa laacabe. Ti dxi gudxi binnigola que naa gudiee' ti libana lu sti guendaridagulisa ni chigápacabe. Ngue nga ni gucané naa para guiaana' raqué.

Lade ca binni guca xhamigua' Filadelfia nuu ti ba'dudxaapa' lá' Geraldine White, naa rabe' laabe Gerri. Nabé nánnabe de Biblia ne nagueenda ridxelábe modo guiní'nebe binni ora ma' zigucheechebe diidxa' de yoo pur yoo. Ne laaca cá íquebe gácabé precursora, ne nabé risaca ngue para naa. Bichaganadu 23 sti' abril iza 1949.

Bíni' invitárcabe laadu Galaad

Nabé nga gucuá íquedu chuudu Scuela sti' Galaad ne guseendacabe laadu de misioneru sti guidxi. Ngue runi, laga cabézadu bizulú bicha'du

***Naa ne Gerri dxi mayaca chuudu Galaad
(1952)***





*Guyuusidu Galaad, yegánnadu ca
binni ridagulisaa ladu guete' de Estados Unidos*

modo nabánidu para ganda gúnidu ni rinábacabe ca binni ni cá ique che' scuela que. Qué nindaa gunábacabe laadu chuudu Lawnside (Nueva Jersey), de raqué guyuudu Chester (Pensilvania) ne despué yendadu Atlantic City (Nueva Jersey). Raqué nuudu dxi bisa'du chupa iza de bichaganadu, yanna huaxa ma' zanda gué'ndadu xquí'chidu para chuudu Galaad. Peru gupa xidé gulézadu. Xifnee ya'.

Ra bizulú ca iza stí' 1950, bizulú bitagulisaacabe stale hombrehuiini' para gácaca' soldadu ne chitindeneca' Corea. Ca binni ni runi dxiiña' ra oficina ni nuu Filadelfia ni cutagulisaa ca binni que nabé rini' íqueca' mal de ca testigu stí' Jiobá partí' qué rieca' lu guerra. Peru despué gudxi ti juez naa ma' biyya' FBI modo huabane' ne bidii-cabe cuenta dxandí' qué riaa' lu guerra. Ngue runi, 11 stí' enero iza 1952, Presidential Appeal Board (Tribunal Presidencial de Apelación) guní'ca' qué zanda chuaa' lu ejércitu partí' nuaa' ndaaní' ti religión.

Lu beeú agosto stí' iza que, naa ne Gerri guca invitardu para chuudu clase grande stí' Galaad ni chiguzulú lu beeú septiembre. Dxi cayaca cursu que nabé guní' íquedu guseendacabe laadu stí guidxi. Doris bizana', guyé clase trece stí' Galaad ne biseendacabe laa de misionera Brasil. Peru nabé bidxagayaadu ora bidú'yadu paraa biseendacabe laadu. Biseendacabe laadu guete' de Alabama para chigánnadu ca neza binni ridagulisaa ra rié puru si binni negru. Nabé guyu'du triste pur biseendacabe laadu raqué partí' laadu jma guní' íquedu chigúnidu xhiiña' Jiobá stí guidxi.

Primé neza binni ridagulisaa yegánnadu nga ni nuu Huntsville. Ora yendadu raqué guyuudu ra lidxi ti gunaa xpinni Cristu ni bidii lidxi para guiaanadu, ne laga candétedu ca maleta stídu binadiágadu ora guní'be lu teléfono: «Ma' beendañá ca xcuidi que». Nápadu 24 iza dxiqué, ne rullu' jma nahuiinidu que bia' iza nápadu que. Bia' tiempu yegánnadu ca neza binni ridagulisaa nuu raqué binibiá'cabe laadu casi ca Xcuidi.

Ladu guete' stí' Estados Unidos, binibiá'cabe ni casi *Bible Belt* (el cinturón de la Biblia), nabé runi respetar ca binni nuu raqué Stíidxa' Dios. Ngue runi, ora guzulú gucheechedu diidxa' ruzá'tedu chonna cosa:

- 1) Rinidu xiixa ni cayaca lu Guidxilayú.
- 2) Ximodo na Biblia zaca chaahui' ni.
- 3) Xiná Biblia naquiiñe' gúnimu.

De raqué ma'ruluidu laacabe ti libru ni zacané laacabe guiziidicabe jma de Biblia. Cumu nabé bicaadiaga binni laadu pur modo ruzulú rininedu laaca' la? gúdxicabe laadu tiididu lu guenda-ridagulisaa ni biree lá «Sociedad del Nuevo Mundo», ni chigaca ndaaní' guidxi Nueva York lu iza 1953, ne gusihuínnidu ximodo rucheechedu diidxa'.

Bia'galaa iza 1953, gucuaa' dxiiña' de chiganna' guirá' ca grupu de neza binni ridagulisaa ra rié puru si negru. Nabé naro'ba'ca lugar ni naquiiñe' chigánnadu: ladu guete' de Virginia, hasta Florida, ne neza riaazi' gubidxa, riuudu Alabama dede Tennessee. Ca binnigola ni riganna ca neza binni ridagulisaa naquiiñe' chu'ca' listu para guiaaca' ratiica' checa'. Cumu gastí' nisa tubu ndaaní' bañu stí' ca yoo que la? rigázedu ndaaní' ti tina

de guiba' ni nuu cue'estufa ni nuu raqué. Ne galán raqué partí' jma nadxaa ni.

Gúpadu guendanagana partí' ma' gadxé raza laadu

Para ganda gúnidu xhiiñadu ladu guete' de Estados Unidos, naquiiñe' guiní' ique chaahuidu ximodo gúnidu caadxi cosa. Cumu qué rinácame chitiibi ca negru xhábaca' ra ritiibi binni lari la? ora riuu Gerri riní' zitiibi xhaba «na Thompson», zaqué rini' íquecabe laabe nga criada ni runi xhiiña' «na Thompson». Naa naca' binnigola ni riganna ca guendaridagulisa de chonna gubidxa, ne ora rutídidu película ni lá *La Sociedad del Nuevo Mundo en acción* la? rinié' pur teléfono ra tienda para guinaba' ti pantalla naro'ba' para «ta Thompson». Despué ricaa' ni. Rácadu nachá'hui' né binni guirá' ora, ngue runi qué raca nagana para laadu gucheechedu diidxa'.

Ladu guete' de Estados Unidos laaca nuu sti guendanagana, cani nabeza raqué qué ridxaagaca' ca binni ni nabeza ladu guia'de guidxi que. Ti biaje bizeete' ti periódico ni ridoo raqué chigudii xiiñí' James A. Thompson, ti libana lu ti guendaridagulisa, ne laa runi dxiiña' para Sociedad Watchtower Bible and Tract of New York. Ora biinda' caadxi binni ni na periódico que guní' íqueca' de Nueva York naa, ne bicueezaca' permisu nápadu para gúnidu guendaridagulisa de chupa gubidxa que ndaaní' ti scuela. Gupa xidé guyaa' ra scuela que para bisiene' ca maestru

*Caní riganna neza binni ridagulisa ne
xheelaca' lu ti guendaridagulisa ro'ra guyuu
ca hueru ne ca negru (1966)*



que guzaya' scuela ndaaní' guidxi Chattanooga. Ora biiyacabe de neza raqué naa, bidiicabe permisu para gúnidu guendaridagulisa ra scuela que.

Bia'galaa de ca iza stí' 1950, jma cayuu guendanagana partí' qué ridxaaga ti raza ne stí raza ne nuu tiru dede ridíndecabe. Lu iza 1954, caadxi de ca Testigu ni guyé lu guendaridagulisa de chonna gubidxa bidxiichica' partí' nin ti negru qué nudii ti libana raqué. Gunínedu ca bíchidu ne ca bízá'nadu de raza studi cadi guireeca' gana. Lu guendaridagulisa ni guca stí iza que, naa guca' tobi de ca negru ni bidii ti libana raqué, ne dede dxqué jma ma' stale negru bizulú bidiica' libana lu ca guendaridagulisa ni guca ladu guete'sti' guidxi que.

Ra gudi'dí' dxi, ma' qué nidíndepe' ca binni ni nuu ladu guete' de Estados Unidos pur raza stíca', ne chaahui' chaahui' ma' bizulú bidagulisa ca xpinni Cristu de raza negru ne hueru. Cumu ma' cayacani zaqué la? gupa xidé guyé caadxi de ni rucheeche diidxa' ndaaní' gadxé neza binni ridagulisa. Laaca bidxaa ra rucheechecabe diidxa' ne bidxaa ca dxiiña'runi ca xpinni Cristu ni zaniru' lade ca binni ridagulisa. Triste guinini ni, perú stale xpinni Cristu, cásica hueru ne negru, qué ñuulá'dxica' modo cayaca ca dxiiña' que. Perú jma stale de laadu rini' íquedu casi Bixhóze-nu ni nuu guibá', laa qué rusicaca ti raza jma que stí raza. Stale de laadu nápadu xhamígudu lade binni de stí raza. Ne ngape' nga ejemplu sicarú ni bisihuinni familia stinne' lu ca iza 1930 ne 1940 dxi naca' ti hombrehuiini'.

Gucuaadu ti dxiiña' nacubi

Lu enero stí' iza 1969, naa ne Gerri gucuaadu ti invitación para chuudu Guyana, ti guidxi ni nuu Sudamérica, ne nabé biéchedu partí' chuudu raqué. Primeru guyuudu Brooklyn (Nueva York), ra bisiidicabe naa ximodo guireeche diidxa' ndaaní' guidxi Guyana. Yendadu raqué para gúnidu dxiiña' lu bee julio stí' iza 1969. Guca nagana para laadu guibánidu raqué partí' ma' guidí'dí' dieciséis iza de canagánnadu ca neza binni ridagulisa. Naa rune' dxiiña' Yoo Betel ne Gerri rigucheeche diidxa' guidubi dxi partí' misionera laa.



Nayeche' bínidu dxiiña' de misioneru Guyana

Guirá' dxiiña' raca raqué, stube' rune' cani: rugaya' ca guixi ga' nuu raqué, ruseenda' libru ne revista ni rinaba' veintiocho neza binni ridagulisa ni nuu ndaani' guidxi que ne rune' tender ca carta ni ruseenda' ca oficina ni nuu Brooklyn. Rune' dxiiña' catorce ne quince hora guirá' dxi. Gúcani nagana para guirópadu, peru bia'du gúnidu ca dxiiña' que ne bisiéchecani laadu. Dxi yendadu Guyana nuu 950 ni rucheeche diidxa', yanna ma' nuu jma de 2,500.

Nabé galán clima stí' guidxi Guyana, nuu stale cuananaxhi ne verdura raqué, peru ni jma rusieche' laadu nga guidxéladu stale binni ni guyuula'dxi' ganna xi rusidií' Biblia de Reinu stí' Dios. Bia' grande binni ruundané Gerri Biblia guirá' semana, ne stale de ca binni bífndanedu biniisica' lu stiidxa' Dios ne guyuunísaca'. Ra gudi'dí' dxi, caadxi de laacabe guca precursor, binnigola ne misioneru.

Gúpadu jma guendanagana pur guendahuará

Lu iza 1983, bixhoze' ne jñaa' nabézaca' Estados Unidos ne caquiiñeca' chu' tu gacané laaca'. Naa ne Gerri bidagulisaadu ne Doris bizana' —ni ma' ziné treinta y cinco iza de misionera Brasil— para guidú'yadu ximodo gacanedu laacabe. Guní' Doris guibigueta' ra nuucabe para gu'ya' laacabe. Guní' íquebe guibiguétabe purti' zaqué tobi si de laadu zusaana de gaca misioneru, purti' pa guibiguetaniá' Gerri la? guirópadu nga zusaa-

nadu dxiiña' de misioneru. Despué, guti si bixhoze' ne jñaa', biaana Doris casi precursora especial ndaani' guidxi Chattanooga.

Lu iza 1995, bihuinni napa' cáncer de próstata ngue runi bibiguétadu Estados Unidos. Yendézadu Goldsboro (Carolina del Norte), purti' de ráqué rúnidu biáqueca tiempu para chigánnadu ca binnilidxe' (Tennessee) ne para chigánnadu ca binnilidxi Gerri ni nuu (Pensilvania). Yanna jma ma' cayuniná cáncer ca naa, nga runi naa ne Gerri nuudu ndaani' ti neza binni ridagulisa ni nuu Goldsboro casi precursor especial ni huará.

Ora rini' ique' modo ma' bineniá' Gerri xhiiña' Jiobá jma de sesenta y cinco iza, rudiee' xquíxepé' Jiobá pur guirá' ndaaya' ni ma' bidii laadu. Huacaadu stale ndaaya' purti' rúnidu intiica dxiiña' ndaani' xquidxi Dios. Bia' dxi huabánidu ma' bidú'yadu dxandí' ca diidxa' guní' David: «Tuuxa ni qué gusaana lii [Jiobá] laaca qué zusaanalulu» (2 Sam. 22:26).



CHINÁNDANU EJEMPLU GALÁN STIBE NE CADI GÚNINU CA COSA MALU BÍ'NIBE

«Quíbanu lu dani stí' Jiobá [...]; ne laabe zusiidibe laanu sanu lu ca neza stibe, ne dxandipe' zazanu lu cani.» (ISA. 2:3)

LAANU, ca xpinni Jiobá, nánnanu zeeda stale relatu lu Biblia ni zanda gacané laanu. Ruzeteni ejemplu stí' stale hombre ne gunaa ni bizuubaca' stiidxa' Dios ne naquiiñe' chinándanu ejemplu stica' (Heb. 11:32-34). Peru laaca ruzeeteni historia stí' caadxi binni ni cadi naquiiñe' chinándanu ejemplu stica' purti' cadi jneza modo bibánica' ne modo guní' íqueca'.

2 Caadxi de ca binni ni ruzeete' Stiidxa' Dios rusihuínica' ti ejemplu galán ni naquiiñe' chinándanu, peru nuu tiru bí'nica' caadxi cosa malu ni cadi naquiiñe' gúminu. Guiní' íquenu de David, laa guca ti pastor ni qué nudxiiba' laca laa ne despué guca ti rey ni bi'ní' mandar stale binni. Gúcabe ti binni ni guyuula'dxi' guni ni jneza ne bi'ní' crebe zacané Jiobá laabe; peru laaca bí'nibe cosa malu, guyuunebe Bat-Seba, biitibe Uriás ne bí'nibe ti censu ni cadi naquiiñe' númere. Peru cadi de laabe chiguininu lu tema rí', sínuque de xiiñibe Salomón, laa laaca guca rey ne bicaa libru ni zeeda lu Biblia. Primeru zadú'yanu chupa cosa galán ni bí'nibe ni naquiiñe' chinándanu.

Gupa Salomón stale guendabiaani'

3 Jesús nga zeeda gaca Salomón ni jma risaca ne guní'be zanda chinándanu ejemplu stí' rey Salomón. Bí'nibe ni ora gúdxibe ca judíu: «Beeda [ti reina] ra nuu Salomón purti bina diaga be pabiá' riene ne nuu né Dios laa. Ne dxi cuidxi Dios cuenta binni la? zusegu be ruua ca binni

1, 2. Xi chupa modo zanda gacané ca ejemplu ni zeeda lu Biblia laanu.

3. Xiñee zanda guinini guca Salomón ti ejemplu sicarú para laanu.

nuu yanna rí' purti laabe beeda be de zitu, beda guna diaga be Salomón, ne naa jma risaca que Salomón ne nuua ca' lade tu ne qué na tu icaa tu stiidxa'» (Mat. 12:42). Nabé binibiá' binni laabe pur guirá' guendabiaani' gúpabe ne laaca guní'be naquiiñe' gúminu stipa pur gácanu ti binni nuu xpiaani'.

4 Dxi nacubi guca Salomón rey, bihuinni Jiobá lu ti bacaanda'stibe ne gudxi laabe guinábabe intica gacalá'dxibe. Cumu nánnabe caquiiñe' guiziidibe stale cosa la? gunábabe guendabiaani'. Biblia na: «Napa xidé gudiilu' siervu stilu' ti ladxitdó' ni ruzuuba'dxi' para ganda gune' juzgar xquídixilu', ne guiene' xii nga ni jneza ne ni cadi jneza, purti' nabé stale ca binni xquídixilu', tu laa zanda guni juzgar laacabe ya'» (1 Reyes 3:9). Nabé guyuula'dxi' Dios ni gunábabe que, purti' lugar de nicá íquebe ñápabe bidxichi ne nusisácacabe laabe, gunábabe guendabiaani'. Ngue runi bidii Dios laabe «ti ladxitdó' ni nuu xpiaani' ne ni riene», ne laaca bidii laabe stale bidxichi (1 Rey. 3:10-14). Casi guní' Jesús que, gunna stale binni de laabe dede reina de Seba, ne laa guzá zitu para yeguuya pa dxandí' nuu xpiaanibe (1 Rey. 10:1, 4-9).

5 Yanna rí', qué zabézanu guni Dios ti milagru para gudii laanu guendabiaani'. Dxandí' na Salomón rudii Jiobá ni, peru laaca guní'be xi naquiiñe' guni cada binni para ganda guicaani: «Bicaadiaga chaahuí' guendabiaani' stí' Dios, ti gucaalu' ladrido'lo' ganna xii nga jneza ne xii nga ni cadi jneza». Ne laaca bisihuúnnibe naquiiñe'

4, 5. Ximodo beeda gapa Salomón guendabiaani', ne ximodo zanda gápanu ni.



guni binni stipa para gapa guenda ca. Xiñee ya'. Purtí' biquiñibe ca diidxa' rí': «Gucaalu' ridxi' ne «cadi guasaana de guyúbilu» (Pro. 2:1-6). Racá ridú'yanu naquiiñe' gápanu guenda ca ne zanda guidxélanu ni.

6 Galán ninabadiidxanu laca laanu: «Ñee cá ique' chinanda' ejemplu stí' Salomón ne riuu-ladxe' gapa' guendabiaani' stí' Dios cásica laabe la?». Ca dxi rí' nabé ricá ique binni xhiiña' ne uguu chaahui' xpueltu, purti' nabé nagana para gapa binni bueltu yanna, ne rucaani laacabe gú-yacabe xi zanda guiziidcabe ra scuela ne pabiá' tiempu chécabe ni. Yanna, ximodo nuunu né ca binnilídxinu ya'. Ñee rusihuinni cani rigui-xhe íquenu gúlinu risaca para laanu gápanu guendabiaani' stí' Dios ne cuyúbinu ni la? Ñee zanda gucha'nu cani cá íquenu ugaandanu ti gápanu guendabiaani' ca la? Qué ziuu dxi guirá ca ndaaya'stinu pa gápanu ni ne gúlinu ni na ni lu xquendanabáninu. Sicarí' cayabi Salomón cani guni zacá: «Zánnalu' xii nga ni jneza ne ximodo raca juzgar jneza, ne zúnilu' puru si ni jneza, ne zuaa íquelu' salu' lu neza ni nacha'hui» (Pro. 2:9).

6. Ximodo rusihuínningu racalá'dxinu gácanu ti binni nuu xpiaani' casi Salomón.

Bidii Salomón lugar gabi Dios laa xi naquiiñe' guni


Guyuu guendariuudxi tiempu bi'ní' adorar Salomón Dios

⁷ Dxi nacubi bizulú cayuni mandar Salomón, guni'be guidxaa tabernáculo ni caquiiñe' dede dxi nabani Moisés pur ti yu'du' sicarú (1 Rey. 6:1). Laani nga ni rábinu yu'du' stí' Salomón, peru cadi purti' laabe guni' íquebe modo cuini ne laaca qué ñúnibe ni para si ganna binni nabé nuu xpiaanibe para gucuibe yoo o para gú'yaca' riulá'dxibe gudiibe. David nga gudixhe ique cuí yu'du' que ne bidii stale bueltu para laani, peru Dios nga guni' ximodo gácani ne xi guirá' chu' ndaani' ni (2 Sam. 7:2, 12, 13; 1 Cró. 22:14-16). Peru lu ná' Salomón nga biaana gaca ca dxiiña' que, ne gudidí' gadxe iza aronda' para biluxe cani (1 Rey. 6:37, 38; 7:51).

⁸ Zacá bisaana Salomón ti ejemplu galán para laanu ti cadi guire'nu gana de gúlinu caadxi dxiiña' sicarú ne gúlinu ca cosa ni jma risaca. Dxi bilux e yu'du' que ne biuu guiña stí' pactu ndaani' ni, bí'nibe ti oración nezalú stale binni ra gúdixibe Jiobá: «Cadi guasaana de guuyadxilu' yoo rí' ridxi' ne huaxhinni, lugar ra guni'lú' de laa sicarí': "Racá ziuu la'ya", para gucaadiágalu' oración stí' ca xpínnilu' ni guni orar lugar rí» (1 Rey. 8:6, 29). Ca israelita ne binni de sti guidxi zanda

7. Ximodo beeda gapa Dios ti yu'du' naro'ba'.

8, 9. 1) Xi ejemplu sicarú bisaana Salomón para laanu. 2) Ximodo guyuu ca binni que pur gudixhe ique Salomón guni adorar Dios primeru.



guni orarca' ra yu'du' que, purti' gurí ni para gusi-sácani lá Dios (1 Rey. 8:30, 41-43, 60).

⁹ Ximodo guyuu ca binni que pur gudixhe ique Salomón guni adorar Dios primeru ya'. Biluxi si yu'du' que, guirácame «biéchecabe ne guyuu ladxidócame nayeche' pur guirá' cosa sicarú ni bi'ní' Jiobá pur David xpinni ne para Israel» (1 Rey. 8:65, 66). Cuarenta iza bi'ní' mandar Salomón gúpaca' ca binni que stale cosa galán ne guyuu guendariuudxi ládeca' (1 Rey. 4:20, 21). Biblia na: «Judá ne Israel nabé gúpaca' guendariuudxi, cada tobi gurí xa'na' ca lubá' uva stí' ne xa'na' du'ga' stí', dede Dan hasta Beer-seba, guirá' dxi bi'ní' mandar Salomón» (**1 Reyes 4:25**). Zacá rihuínñini lu Salmo 72, ne racaneni laanu gánnanu xi guirá' ndaaya' zápanu ora ma' guni mandar Jesucristu, Salomón ni jma risaca (Sal. 72:6-8, 16).

Riguixhená cani bizaaca Salomón laanu

¹⁰ Yanna, xiñee rininu laaca riguixhená xquendanabani Salomón laanu ya'. Zándaca primeca ni gueeda lu xquendabiaaninu nga bicheebe ora gúpabe jnadixibe ne bichaganabe stale gunaa de sti guidxi. Biblia na: «Ne dxi ma' bio'xho' Salomón bicusudxi ca xheelabe ladxido'be para guni adorarbe xcaadxi dios; ne ma' qué ninándadibe Jiobá de guidubi ladxido'be» (1 Rey. 11:1-6). Cadi dxandí' qué racaládxinu gúninu guenda-huati bí'nibe ca la? Peru cadi racá si nga bichee rey ri'. Laaca nuu xcaadxi cosa ni cadi jneza bí'nibe ni zándaca qué rietenaládxinu, ne naquiiñe' guixélenu de laacani.

¹¹ Salomón bí'ní' gobernar cuarenta iza (2 Cró. 9:30). Yanna guidú'yanu xiná Biblia: «Peru Rehoboam, xiiñí' Salomón, beeda gaca rey stí' Judá. Cuarenta y un iza napa Rehoboam dxi bizulú bí'ní' mandar, ne diecisiete iza bí'ní' mandarbe Jerusalén, guidxi ni gulí Jiobá de lade guirá' tribu stí' Israel para uguube labe raqué. Ne jñaabe nga Naamá ti ammonita» (**1 Reyes 14:21**). Xi rizi'dinu de ca diidxa' ca ya'. Versículo ca na, ma' napa

10. Ora ma' caninu de ra bichee Salomón, xi rietenaládxinu primeca.

11. Xi zanda guizí'dinu de primé guendaxheela' stí' Salomón.

Rehoboam 41 iza, dxi guti Salomón ne beeda gaca rey lugar stibe, ne jñaabe Rehoboam nga «Naamá ti ammonita». Racá ridú'yanu maca bichaganá' Salomón ti gunaa de sti guidxi ante gaca rey. Nabé runi adorárcabe bidó' xquidxi gunaa ri' ne laaca ruacaalúcabe xquidxi Dios (Jue. 10:6; 2 Sam. 10:6). Qué gánnanu pa laaca bi'ní' adorar gunaa ri' bidó'. Pa zacá gúcami, zándaca bisaanabe religión ni cadi dxandí' ra guyuube ne despué ma' bi'ní' adorarbe Jiobá, cásica bi'ní' Rahab ne Rut (Rut 1:16; 4:13-17; Mat. 1:5, 6). Pa guca gunaa ca xpinni Dios o pa co' la? zándaca bidxaaga Salomón bixhózebe ne jñaabe ne ca binnilídxibe, laandaca' qué núnica' ni na Jiobá.

¹² Bizaaca ti cosa ni cadi jneza dxi bizulú bí'ní' mandarbe. Biblia na: «Bichaganá' Salomón xiiñí' Faraón, rey stí' Egipto ne yenebe laa ndaaní' guidxi stí' David» (1 Rey. 3:1). Ñee bi'ní' adorar gunaa ri' Dios casi bi'ní' Rut la? Biblia qué rini'dí' pa bí'nibe zacá. Ni ruzeete' Biblia nga dxi bicuí Salomón ti lídxibe (zándaca laaca bicuibe lídxibe caadxi binnidxaapa' de Egipto), bí'nibe ni zitu de Guidxi stí' David. Xiñee ya'. Purti' Biblia na qué zanda dí' guibani cani qué runi adorar Dios gaxha de ra nuu guiña stí' pactu (2 Cró. 8:11).

¹³ Zándaca guní' ique Salomón jma galán modo ziuu guidxi Israel ne Egipto pa guichaganá' ti princesa de Egipto. Peru jneza ngue ni guní' íquebe la? Co'. Purti' stale siglu ante, maca guní' Dios cadi naquiiñe' guichaganá' ca xpinni ca gunaa de Canaán, ne guní'be gunape' nga ca guidxi ni cadi naquiiñe' guidxaagacabe (Éxo. 34: 11-16). Ñee guní' ique Salomón zanda guidxaaga ca binni de Egipto purti' si cadi zeeda lácabe lade ca guidxi ni guní' Dios que la? Pa zacá guní' íquebe la? cadi jneza dí' biiya' Dios ni. Salomón qué nulabi ni maca guní' Jiobá ora bí'ní' mandar cadi guichaganácame binni ni runi adorar dios ni cadi dxandí', purti' zabechuca' laacabe. Biblia na: «Purti' zuxhélebe xiiñilu' de chinanda naa, ne zúnicaibe ni na xcaadxi dios; ne xiana stí' Jiobá dxandipe'ziaba luguiatu, ne nagueendaca zunduuxabe laatu» (**Deuteronomio 7:4**).

12, 13. Xi ti cosa cadi jneza bí'ní' Salomón dxi bizulú bí'ní' mandar, ne ximodo gucaládxibe nuchabe yú luní.

¹⁴ Ņee rusihuínninu pur modo nabáninu qué zuche'nu casi bichee Salomón la? Ti gunaa xpinni Cristu zanda guini' napa razón para guierené ti binni ni qué runi adorar Dios, ne zacá ma' cadi chinanda conseju ni zeeda lu Biblia ra na «zanda ichaganá be tutiisi acala'dxi be, peru gaca ni ti xpinni Señor» (1 Cor. 7:39). Zándaca chu' tu guini' ique gasti' naca guidxaaga ca binni ni runiné dxiiña' despué de ma' bireeca' de dxiiña'. O zándaca ra scuela chu' tuuxa lu ti grupu para chichíteca' ora ma' biluxe clase stica'. Ne zándaca chu' tuuxa ni napa ti negocio qué ná' quixe impuestu bia' naquiiñe' quixe o gusigui ora guinabadiidxacabe laa xiixa ni biñi' purti' zatuú lú pa ganna binni ni. Ni jma risaca nga guietenalá'dxinu zanda gueeda guché'nenu Dios ora guini' íquenu gasti' naca guixélenu de ca mandamiento sti' Dios, cásica biñi' Salomón.

¹⁵ Biblia ruzeete' maca bichaganá' Salomón princesa de Egipto que ante guicaabe guenda-biaani' ni gunábabe Jiobá ne guirá' bidxichi bidii laabe (1 Rey. 3:10-13). Necá qué nuzuubabe stiidxa' Dios, qué ruzeete' dí' Biblia bicaaná' Dios laabe oraqueca ne laaca qué nusabaná' dí' laabe. Xiñee ya'. Purti' Jiobá nanna de yú laanu ne ruche'nu (Sal. 103:10, 13, 14). Cadi guiaanda' laanu zabeendunu xiixa pur intiica cosa gúninu, nuu tiru rihuínnicani nagueendaca ne nuu tiru rindaan cani.

¡Gúpabe stale xheelabe!

¹⁶ Lu libru sti' Cantar de los Cantares, ridú'ndanu dede cadxagaya rey ri' ora guní' de ti binnidxaapa' nabé sicarú ne nabe jma galán laa que 60 reina ne 80 jnadxiibe (Cant. de Cant. 6:1, 8-10). Ņee caní' Salomón de ca gunaa ni maca napa ca dxi cayuni mandar que la? Pa zacá ni, mápeca nápabe stale gunaa ca dxi que. Qué gánnadinu pa stale de ca gunaa ca, o guirácabe biñi' adorárcabe Dios. Ni nánnanu nga qué nuzuuba' Salomón stiidxa' Dios. Lu ley bidii Jiobá

14. Ximodo rusihuínninu ma' bizí'dinu de ni bizaaca Salomón.

15. Ximodo bisihuinni Jiobá bilaselá'dxi' Salomón, peru xi cadi naquiiñe' guiaanda' laanu.

16. Ora gupa Salomón stale gunaa, xi mandatu sti' Dios qué ninándabe.

Moisés que zeeda tobi para binni ni gaca rey sti' Israel: «Cadi naquiiñe' gápabe stale xheelabe, ti cadi guixélebe de Dios» (Deu. 17:17). Peru biaje ri' laaca qué nusaana dí' Jiobá laabe. Ne gucuuarube ndaaya' sti' Dios para bicaabe libru Cantar de los Cantares.

¹⁷ Ņee rini' nga zanda guixele' Salomón de ca ley sti' Dios ne gutidi' Dios cani biñibe zacá si la? Ņee rini' íquenu laaca zanda gúninu casi biñibe ca la? Co'. Ni rusiidini laanu nga nuu biaje xadxí runi huantar Jiobá tuuxa ni cadi ca-yuni ni jneza. Peru cadi purti'si qué racaná ti xpi-nni Dios nagueendaca pur xiixa ni cadi jneza biñi', guinu qué ziuu dxi gacaná pur laani. Guietenalá'dxinu ni bicaa Salomón: «Pa qué gu-lídxecabe xiifíncabe nagueenda ca pur xiixa ni malu biñi' la? qué zusaana de gúnica' ni malu». Ne laaca guni'be: «Peru laaca rudiee' cuenta jma galán zieni cani ridxibi Dios [ni dxandí'], purti' ridxibica' laabe» (Ecl. 8:11, 12).

¹⁸ ¡Nabé triste nga guinu ni, peru bisiaanda' Salomón ni gudxi Jiobá laa gucaa! Dxandí' nga biñibe stale cosa jneza ne pur stale iza guluu Dios ndaaya' laabe. Peru despué deche ca deche biñibe ni cadi jneza, ne biaabe guibánibe zaqué. Gudi'dí' si stale siglu bicaa apóstol Pablo conseju ri': «Cadi quite tu laca laatu, zácaxa tu zanda quite tu Dios. Iruti qué zanda quite laabe, purti irá ni udxiba binni, ngue ca cuee» (Gál. 6:7). Salomón qué nuzuuba' stiidxa' Jiobá purti' «gu-nnaxhiibe stale xheelabe de sti guidxi ne xiiñi' Faraón, ne ca moabita, ca ammonita, ca edomi-ta, ca sidonia ne ca hitita» (1 Rey. 11:1). Zándaca stale de ca gunaa ca qué ñuu dxi nusaana de ñuni adorarca' ca dios stica', ne bicaa ca gunaa que laabe gúnibe zaqué. Gudi'dí' si iza naná modo gudíxebe guirá' ni biñibe purti' bixélebe de neza sti' Dios ne ma'qué ñuula'dxi' Dios ni biñibe. Biblia na: «Ne ora bio'xho' Salomón bicaa ca xheelabe laabe guni adorarbe xcaadxi dios; ne ma'qué ninándadibe Jiobá de guidubi ladxi-do'be casi biñi' David bixhózebe» (**1 Reyes 11: 4-8**).

17. Xi cadi naquiiñe' guiaanda' laanu.

18. Ximodo rusihuinni ni bizaaca Salomón dxandi' ni na lu Gálatas 6:7.



*Ñee rudi'nu cuenta
xi rusiidi' ejemplu
sti' Salomón laanu la?*



Chinándanu ejemplu galán stibe ne cadi gúninu ca cosa malu bí'nibe

¹⁹ Cumu riá Jiobá binni la? gúdxibe Pablo gucaa ca diidxa' ri': «Irá ni ucuá lu Xqui'chi Dios ucuá para usiidi laanu, ti pur laani gata dxí ladxitó' no ne cadi ixhacala'dxi nu. Ne zacá cadi guiaana nu de icá lú nu Dios» (Rom. 15:4). Lade «irá ni ucuá» zeeda stale ejemplu sti' hombre ne gunaa ni gupa fe Dios. Pablo guní': «Xi ru zanda gabe laatu ya'. Ñuuladxe ñue nía laatu de Gedeón ne Barac ne Sansón ne Jefté ne David ne Samuel ne ca profeta. Peru ma qué zanda. Irá cabe bini cre cabe Dios. Nga runi gunda gudixhe dxí cabe rey, ne bini mandar cabe jneza, ne uca-né Dios laacabe casi bidii stiidxa zacané laacabe. Ne laca bini cre cabe, [ne cani bidxibi la?] bicaa lú ca sin nidxibi ca» (Heb. 11:32-34). Zanda cueendunu ni galán de ca ejemplu ni ruzeete' Stiidxa' Dios ne naquiiñe' gúninu ni.

²⁰ Peru lu Biblia laaca zeeda ejemplu ni cagui-xhená laanu. Luni zadxélanu ejemplu sti' caadxi hombre ne gunaa ni bí'ní ni na Dios ne biquiñébe laaca' para bí'nica' xhiiñabe. Ora guidú'ndanu Biblia zudi'nu cuenta padxí ne ximodo

- 19.** Xi ejemplu sicarú zeeda lu Biblia.
20, 21. Xiñee ma' gudixhe íquenu guizí'dinu xiixa ni galán de ca ejemplu ni zeeda lu Biblia.

bireechúcabe de neza sti' Dios ne bí'nicabe cosa ni cadi jneza, ni cadi naquiiñe' gúninu. Nuu biaje zadú'yanu chaahuidugá bizulú guní' íquecabe cosa ni cadi jneza ne pur ni bí'nicabe nabé gucanácabe despué. Xi naquiiñe' gúninu para gánnanu xi rusiidi' ca relatu ri' laanu ya'. Guinabadiidxanu laca laanu: «Ximodo bizulú guní' ique binni ca guni cosa malu. Ñee zanda gueeda guizaaca' ni bizaacabe ca la? Xi zanda gune' para cadi guchee' casi bicheecabe ya'».

²¹ Galán gúninu guiní' ique chaahuinu lu ca relatu ri'. Pablo guní': «Irá nga bizaaca ca bixhoze gola nu ne ucuá ni lu Xqui'chi Dios para izi'di nu idu'ya gá nu laanu, cani nabani nu ra ma zeda iluxe guidxilayú ri» (1 Cor. 10:11).

Xi bizi'dinu

- Xi ribeendunu de ca ejemplu ni ruzeete' Biblia sti' ca binni ni bichee ne cani bizuuba' diidxa'.
- Xiñee deche ca deche bí'ní' Salomón ni cadi jneza.
- Xi zanda guizí'dinu de ca cosa ni cadi jneza bí'ní' Salomón.

XIÑEE NAQUIIÑE' CHINÁNDANU NI NA ESPÍRITU STI' DIOS

«*Lii nga Dios stinne'. Nabé nacha'hui' espíritu stilu'; gului'ni naa gune' ni jneza.*»

(SAL. 143:10)

NEE huayuu dxi iquiiñelu' ti brújula para gánnalu' paraa nuulu' la? Ti brújula nga ti cosa ni napa ti aguxa' ni napa imán, ne laanu rului'ni binni paneza riaana ladu guia'. Xiñee puru ladu guia' rudyilú aguxa' ca ya'. Purti' nuu ti stipa ni rigubayú ni. Ne stipa ca nga rucaani aguxa' ca gudxiilú ladu guia'. Ma'stale siglu ca explorador ne xcaadxi binni ni runi biaje bidiicabe cuenta paraa nuucabe purti' biquiñecabe ti brújula neca nuucabe lu nisdod'o sti lugar.

² Peru nuu sti stipa ni jma risaca ni zanda gacané laanu gánnanu ximodo guibáninu, stipa ri' qué rihuinni ni. Xi laani ya'. Laani nga ni riní' ca primé versículo sti' Biblia. Libru sti' Génesis cayabi laanu xi bi'ní' Jiobá ma' raca stale iza, relatu ri' na: «Primé que Dios bizá' guibá' ne guidxilayú». Laanu nánnanu biquiñebe ti cosa guizá' nadipa' para biza'be cani. Biblia na: «Stipa ni riquiñe' Dios biniibi ni cherí'cherica' lu nisa que» (Gén. 1:1, 2). Xi stipa nga biquiñe' Jiobá ya'. Laani nga espíritu santu, stipa stibe. Ne laanu rudi'nu xquíxepe' Dios pur biquiñe' stipa sti' para bizá' laanu ne para bí'nibe xcaadxi cosa (Job 33:4; Sal. 104:30).

³ Cadi naquiiñe' gánnasinu riquiñe' Jiobá stipa sti' para guicaanu bi ne guibáninu galán. Naquiiñe' gudi'nu lugar gacaneni laanu lu xcaadxi cosa. Jesús pe' gudxi ca discípulo sti' sicarí': «Espíritu [...] zusiene laatu irá ni

1. Bisiene né ti ejemplu ximodo zanda gacané ti stipa ni qué ridú'yanu laanu.

2, 3. 1) Xi ti stipa biquiñe' Jiobá raca stale millón de iza. 2) Ximodo nánnanu zanda gacané espíritu santu laanu.

dxandí» (Juan 16:13). Yanna, xipe' nga espíritu santu ne ximodo zanda gacaneni laanu ya'.

Xii nga espíritu santu

⁴ Ora ma' zigucheechenu diidxa' ridxélanu hombre ne gunaa ni runi cré de Trinidad. Nga runi, rini' íquecabe naca espíritu santu ti binni clásica Dios ne Xiiñí', neca cadi dxandi' ni (1 Cor. 8:6). Cumu zacá nga runi cré binni la? nga runi ridú'yanu riquiñe' stale Biblia letra mayúscula para gucaa: Espíritu Santo. Peru ti profesor ni rusiidi' diidxa' griegu, ni lá' Joan F. Mira, bicaa ti libru ra zeeda ca Evangelio, ne libru sti' Hechos ne Apocalipsis ra bicaabe espíritu santu ne letra minúscula, bí'nibe ni lu iza 2006 ndaaní' guidxi España. Ne bí'nibe ni purti' nánnabe Biblia qué riní' dí' naca espíritu ti binni.

⁵ Yanna, paraa nga biasastí guni cré binni Trinidad ya'. *Traducción del Nuevo Mundo de las Santas Escrituras (con referencias)* cusiene lu ti nota sti' Génesis 1:2: «Cadi bibí'xhisini "espíritu", [lu diidxa' hebreu] rú aj, sínuque laaca ribí'xhini "bi" ne xcaadxi diidxa' rini' nácani ti stipa ni qué rihuinni» (zanda guchaagatu ni né ca nota sti' Génesis 3:8 ne 8:1). Clásica qué ridú'yanu bi Peru nánnanu nadipa' ni, zacaca nga espíritu santu, neca qué ridú'yanu ni, Peru rudi'nu cuenta nuuni. Ne laani nga ti stipa ni rudi'nu Dios binni o ca cosa para gaca ni ma' gudixhe ique Jiobá. Nee raca nagana para laanu guni crenu de Dios ni jma

4, 5. 1) Cani runi cré Trinidad, xi riní'cabe de espíritu santu neca cadi dxandi' ni. 2) Ximodo zanda gusiénenu xii nga espíritu santu.

nandxó' ne nayá nga zeeda espíritu rí' la? Co' xa (*biinda' Romanos 1:20*).*

6 Dxandí', zanda iquiiñe' Jiobá espíritu stí para gabi laanu xi naquiiñe' gúninu lu xquendanabáninu. Nga nga ni gúdxibe David: «Zudiee' lii guendariene, ne zusiide' lii salu' lu neza ni naquiiñe' chelu» (Sal. 32:8). Yanna, ñee gucala'dxi' hombre rí' gului' Jiobá laa xi guni lu xquendanabani la? Gucala'dxi', laabe gunábabe Dios: «Bisiidi' naa gune' ni nalu', purti' lii nga Dios stinne'. Nabé nachahui' espíritu stilu'; gului'ni naa gune' ni jneza» (Sal. 143:10). Laanu laaca naquiiñe' gusihuínninu riulá'dxinu gului' espíritu santu laanu xi naquiiñe' gúninu lu xquendanabáninu. Xiñee ya'. Guidú'yanu tapa razón.


Qué zanda uguu jnézanu laca laanu

7 Primé razón nápanu para gudi'nu lugar gacané espíritu santu laanu nga purti' qué zanda gúninu ni laasinu. Diidxa' *gulu'i* ca rini'ni «gului'ni tuuxa ti neza» ne laaca rini'ni «uguu jneza», «gudii conseju» (*Diccionario Anaya de la Lengua*). Dxandí', cadi guyá' dí' binni para uguu jneza laca laa, ne jma naxoo gúcani purti' gulenenu donda. Zacape' nga bicaa Jeremías: «¡Nanna' dxiche' Jiobá, binni guidxilayú cadi lu ná' dí' nuu neza stí. Cadi lu ná' dí' binni nuu guni mandar ra guzuhuua ñee!» (Jer. 10:23). Xiñee guni' Jeremías zacá ya'. Jiobá bisiene laabe xi pur né ca diidxa' rí': «Ladxidó' binni nga ni jma riguite laa que intiica si cosa, ne qué ridxélani xi gúnini. Tu zanda gunibiá' ni ya» (Jer. 17:9; Mat. 15:19).

* Lu prólogo stí' libru ca na: «Ca binni ni bi'nda' xixa libru lu siglu II o lu siglu III qué liica níní' fqueca' naca espíritu ti dios gadxé de Dios pe' ne Xiiñí', ne ca binni si ni runi cré naca espíritu santu ti dios nga cani runi cré Trinidad, purti' dxiqué qué runibiá' binni Trinidad».

6. Xi gunaba' David Jiobá lu ti oración.

7, 8. 1) Xiñee qué zanda uguu jnézanu laca laanu. 2) Xi ejemplo rusihuinni cadi jneza nga guiní' ique binni zanda guibani lu guidxilayú malu rí' laasi.



8 Guiní' íquenu de ti binni ni zigunibiá' stí lugar ra qué liica huayé ne cadi ziné ti mapa. Pa chebe lugar ca ne cadi chinebe tuuxa ni runibiá' chaahui' raqué ne cadi zinebe ti brújula la? zanítibe. Ne pa qué gánnabe ximodo guibánibe raqué la? zándaca gueeda gátibe. Zacaca nga rizaaca ti binni ni riní' ique zanda guibani ndaani' guidxilayú malu rí' pa qué guyubi gacané Dios laa. Yanna laanu ya'. Ximodo zanda guibáninu ndaani' Guidxilayú rí' sin gátinu ya'. Guinábanu Jiobá laaca ni gunaba' David laabe: «Gucané naa cadi guiree' cue'ya' de lu neza stilu', purti' luni qué zuoxoñe' ñee» (Sal. 17:5; 23:3). Xi zanda gúninu para cadi guireecue'nu de lu neza ni culuí' Dios laanu sanu ya'.

9 Pa qué rudxí'banu laca laanu ne runi crenu Jiobá la? zudiibe laanu espíritu stibe ne zului'be laanu paneza sanu. Peru ximodo ra

9. Casi modo cá ni lu yaza 17, ximodo zanda gacané espíritu stí' Dios laanu ti gánnanu xi gúninu lu xquendanabáninu.

cané stipa ca laanu ya'. Sicarí' bisiene Jesús ni ca discípulo stí: «Peru espíritu santu, ni chiguseenda' bixhoze', casi ñaca naa nuseenda' laa, zusiidini laatu guirá' cosa ne zusietenalá-dxini laatu guirá' ni ma' gudxe' laatu» (Juan 14:26, NM). Guirá' ora naquiiñé' guinábanu Dios gusiene laanu ni guidú'ndanu lu Biblia, ra zeeda cani bisiidi' Cristu. Pa gúrinu zacá, zacané espíritu santu laanu guiénenu pabiá' nuu xpiaani' Jóbá, ne zacá zanda chinádanu ca mandamiento stibe (1 Cor. 2:10). Ne ora guizaacanu xiixa ni cadi cabézanu la? espíritu ca zacané laanu gánnanu xi gúrinu. Zacaneni laanu guietenalá-dxini ca consejo zeeda lu Biblia ne zacaneni laanu guiene chaahuinu ximodo chinádanu ca consejo ca lu guirá' ni guidxaagalunu.

Bidii Jesús lugar gacané espíritu santu laa

¹⁰ Guiropa razón nápanu para guininu ca quiiñenu gacané espíritu santu laanu nga purti' laani biquiñé' Dios para gucané tobi lucha Xiiñi'. Ante gueeda Jesús lu Guidxilayú

10, 11. Xii nga ni guyuula'dxi' Xiiñi' Dios, ne xi modo gucané espíritu santu laabe.



maca nánnabe ca diidxa' riguixhená rí': «Luguiabe ziuu espíritu stí' Jóbá, espíritu stí' guendanuuxpiaani' ne guendariene, espíritu stí' consejo ne stí' poder, espíritu stí' guendananna ne stí' guendaridxibi Jóbá» (Isa. 11:2). Nabé guyuula'dxi' Jesús gacané espíritu santu laa, purti' bidxaagalube guendanagana lu Guidxilayú rí'.

¹¹ Biiya' Jesús dxandí' guca ca diidxa' ni guní' Jóbá. Ca Evangelio ca riní'cani xi bizaca despué de guyuunisa Jesús: «Yanna, biree si Jesús de ra guigu' Jordán, bidxá tipa ladxdidó' de espíritu santu, ne yené espíritu que laabe cherí' cherica' lu desierto que» (Luc. 4:1, NM). Raqué biaanabe sin gobe, biñi' orarbe Dios ne zándaca gudxi Dios laabe xi guirá' dxiiña' chigúnibe. Espíritu ca gucaneni Jesús para ganna xii nga ni jma jneza guiní' ique ne laaca gucaneni ladxidó' para ganna xii nga ni jma jneza guni. Ngue runi, nánnabe xi gúnibe lu guirá' cosa ne bí'nibe cásipe' modo na Bixhózebe.

¹² Cumu nanna Jesús nabé risaca espíritu santu lu xquendanabani la? gúdxibe ca discípulo stibe guinábaca' ni Dios ne gudiica' lugar gacaneni laaca' (*biinda' Lucas 11:9-13*). Xiñee nabé risaca gúninu casi bí'nibe ya'. Purti' stipa stí' Dios ca zanda gacaneni laanu gucha'nu modo riní' íquenu ti guiní' íquenu cásica riní' ique Cristu (Rom. 12:2; 1 Cor. 2:16). Pa gudi'nu lugar gacaneni laanu lu xquendanabáninu la? zaní' íquenu casi Cristu ne zúninu stipa pur guibáninu casi modo bibánibe (1 Ped. 2:21).

Zanda cueechú espíritu stí' guidxilayú rí' laanu

¹³ Guionna razón ni nápanu para iquiiñenu

12. Xiñee naquiiñé' guinábanu Dios gacané espíritu stí' laanu.

13. Xii nga espíritu stí' binni guidxilayú, ne xi guirá' rucaani binni guni.

Bíni' Jesús casi modo na espíritu stí' Dios

espíritu santu nga partí' racaneni laanu cadi guicá espíritu stí' binni guidxilayú laanu. Nuu ti stipa cucaa ca binni nuu luni gúnica' stale cosa ni qué riuula'dxi' espíritu stí' Dios. Lugar de ñacaneni laacabe niní' íquecabe casi modo rini' ique Cristu laga rucaani laacabe guiní' íquecabe casi modo rini' ique Binidxaba' ne gúnica'ne guirá' ni runi, partí' laa nga ni runi mandar guidxilayú ri' (*biinda' Efesios 2: 1-3 ne Tito 3:3*). Guirá' ni gudii lugar guicá modo rini' ique binni guidxilayú laa ne guni ni na ique nabé naná modo guianabá'. Qué ziuuca' ra guni mandar Reinu stí' Dios (Gál. 5:19-21).

¹⁴ Jiobá rudii laanu guirá' cosa ni zanda gacané laanu gudxí'lunu espíritu stí' binni guidxilayú. Ngue runi, apóstol Pablo bidii conseju ri': «Lachuu né Señor tobi si, ti uzuhuaa chaahui tu, partí nabé nandxo' be ne zacané be laatu [...] ora ucaa lú ni nadxaba laatu» (Efe. 6:10, 13). Jiobá riquiñe' espíritu stí' para gacané laanu gudxí'lunu guirá' ni gulaa Binidxaba' luguijanu (Apo. 12:9). Dxandí' nadipa' espíritu stí' guidxilayú ri' ne qué zanda dí' gucá'nanu guirá' ni nuu luni, pero zanda gudxí'lunu ni partí' jma nadipa' espíritu stí' Dios ne racaneni laanu.

¹⁵ Ora bizeete' Pedru de ca binni ni bisaana de gaca xpinni Cristu lu primé siglu que guní'be sicari': «Cananiti cabe partí bisaana cabe neza cha'hui stí' Dios» (2 Ped. 2:15). ¡Nabé rudi'nu xquíxepe' partí' «cadi espíritu stí' binni guidxilayú ucuua nu, sínueque [...] ni zeeda de Dios»! (1 Cor. 2:12.) Pa gudi'nu lugar gacaneni laanu ne guicaanu guirá' ni cudii Jiobá laanu la? ziu'nu lu neza stibe ne zanda gudxí'lunu espíritu stí' Binidxaba' (Gál. 5:16).

Racané espíritu santu binni gapa guenda sicarú

¹⁶ Caquiiñenu gacané espíritu stí' Dios

14, 15. Ximodo zanda gudxí'lunu espíritu stí' guidxilayú ri'.

16. Xi guirá' guenda zacané espíritu santu laanu gápanu.

laanu partí' zanda gacaneni laanu gápanu caadxi guenda, ne nga nga guidapa razón nápanu (*biinda' Gálatas 5:22, 23*). Cadi dxandí' guirá' xpinni Cristu ñuulá'dxicá' ñannaxhiica' jma, ñuuca' nayeche' ne ñácacá' nadó' la? Nee cadi dxandí' guiranu caquiiñe' gácanu jma nacha'hui', cadi guninanu binni ne cadi guixhacalá'dxinu laaca' la? Tu laa cadi caquiiñe' gapa jma fe, gaca nacha'hui' ne gucueeza laca laa ya'. Guirá' ca guenda ca racanécani laanu, ca binnilídxinu ne ca xpiñni Cristu. Nga runi, naquiiñe' gúninu stipa pur gápanu ca guenda ca lu xquendanabá'ni.

¹⁷ Galán guinabadiidxanu laca laanu: Nee rusihuinni cani rinié' ne cani rune' cudiee' lugar gacané espíritu santu naa ne gapa' ca guenda stini la? (2 Cor. 13:5; Gál. 5:25). Zándaca gudi'nu cuenta caquiiñe' gúninu stipa pur gápanu xcaadxi guenda lu xquendanabá'ni. Xi caquiiñe' gúninu ya'. Caquiiñe' gacanenu espíritu ca para ganda gápanu ca guenda ca. Ximodo ya'. Ora guidú'ndanu Biblia ne xcaadxi libru ne revista, ne guyúbinu ximodo gúninu cani lu xquendanabá'ni ne gúninu stipa pur gácani jma jneza.* Ora guidú'yanu xi guirá' ribeendunu pur espíritu santu ne xi guirá' ribeendú ca xpinni Cristu la? ziénenu xiñee caquiiñe' gacané espíritu santu laanu.

Ñee cudi'nu lugar gacané espíritu stí' Dios laanu la?

¹⁸ Dxi bizá' Jiobá guibá' ne guidxilayú biquiiñebe Jesús «casi tobi ni runi xhiiñabe jnázape'». Ngue runi runibiá' chaahui' Jesús *campo magnético* stí' Guidxilayú, ne laani

* Para gánnalu' xi guirá' guenda rudii espíritu santu biiya' *Torre stí' ni rapa* 1 stí' agosto 2007 yaza 12 dede 16 ne 15 stí' abril 2011 yaza 18 dede 27.

17. Ximodo zanda gápanu ca guenda ni rudii espíritu santu.

18. Xi zanda guizí'dinu de Jesús partí' bidii lugar gacané espíritu santu laa.



*Ora gudi'nu lugar gacané espíritu santu laanu
rucaani laanu gúnimu ni jneza*

nga riquiñe' binni para ganna paneza nga ladu guia' ne ladu guete', paneza rindani gubidxa ne paneza riaazi' ni (Pro. 8:30; Juan 1:3). Guiruti' ganna pa biquiñe' Jesús ni ma' bizé'tenu ca para ganna paladu nuu. Peru Biblia ruzeete' gucané espíritu santu Jesús lu xquendanabani. Laabe bidiibe lugar gacaneni laabe, ngue runi, ora chigúnibe xiixa la? bínibe ni de guidubi ladrido'be (Mar. 1: 12, 13; Luc. 4:14). Nee rúninu casi bí'nibe ca la?

19 Ca dxi stinu ri' racaneru' espíritu santu binni ni gudii lugar. Xi zanda gúnimu para gacaneni laanu ya'. Ora guinábanu Jiobá gudii laanu stipa ca ne gudi'nu lugar gacaneni laanu (*biinda' Efesios 3:14-16*). Naquiiñe'

19. Xi caquiiñe' gúnimu para gacané espíritu santu laanu.

gúnimu casi modo bi'ni' orarnu Dios ne gyúbinu conseju ni zeeda lu Biblia, ni gucané espíritu santu guicá (2 Tim. 3:16, 17). Naquiiñe' chinádanu cani cayabi Stiidxa' Dios laanu ne gudi'nu lugar gacané espíritu santu laanu. Pa gúnimu zacá la? zusihuínninu runi crenu zanda gacané Jiobá laanu sanu ndaaní guidxilayú malu ri'.

Biénelu' cani ma' bizí'dinu ca la?

- Ximodo racané espíritu santu laanu.
- Xi tapa razón nápanu para gudi'nu lugar gacané espíritu santu laanu.
- Xi caquiiñe' gúnimu para cueendunu ni galán pur guirá' ni rudii espíritu stí' Dios.

CA XPINNI DIOS NI BIBANI DXIQUÉ BÍ'NICA' NI NA ESPÍRITU STIBE

«*Jiobá, Dios ni jma nandxó' biseenda' naa.*» (ISA. 48:16)

DEDE dxi bibani Abel huayuu hombre ne gunaa ni gupa fe Dios, pero «cadi irá binni runi cre» (2 Tes. 3:2). Yanna, ximodo zanda gápanu ni ne gusihuínninu ni lu guirá' ni gúni-nu ya'. Ra guidú'ndanu Biblia, purti' «riale fe ra guna diaga cabe stiidxa Cristu» (Rom. 10:17). Laani nga tobi de ca guenda ni napa espíritu (Gál. 5:22, 23). Nga runi, pa racaládxinu gaca fe stinu naguidxi la? naquiiñe' guicaanu espíritu suntu.

² Nuu tu rini' maca zeeda ca binni ni ruzeete' Biblia para gápaca' fe, peru cadi zacá ni, purti' laaca «binni guidxilayú casi laanu» laacabe (Sant. 5:17). Cásica guirá' binni, laaca guyuu orá qué nidxélacabe xi ñúnicabe, bidxíbicabe ne laaca guní' íquecabe qué zanda gúnicabe xiixa dxiiña'. Peru gunda bidxiilúcabe intiica guenda-nagana beeda luguiácabe. Xiñee ya'. Purti' bi-quiiñe' Dios espíritu stí' para bín'i laacabe binni nadxibalú (Heb. 11:34). Guidú'ndanu modo bibani chupa chonna de ca binni ca ne guidú'yanu ximodo gucané espíritu stí' Jiobá laacabe. Ora guidú'ndanu ni bizaacacabe zaguucaní gana laanu para guni huantarnu tiempu ri', purti' nuu stale cosa ni rucaa laanu gusihuínninu pa dxandí' naguidxi fe stinu.

Bidii espíritu sti' Dios stipa Moisés

³ Sicari' ruzeete' Biblia de Moisés lu iza 1513

1, 2. Xi caquïñe' gúñinu para gápanu fe, ne xi za-beendunu ora guidú'ndanu ejemplu stí' ca binni ni bizuuba' stiidxa' Dios dxique.

3-5. 1) Ximodo nánnanu gucané espíritu santu Moisés para bíni' xhiiña'. 2) Ximodo rusiidi' ejemplu stí' Moisés laanu rudii Jiobá espíritu stí' ca xpi-nni

ante de ca dxi stí' Jesús: «Jma nadó' guca Moisés lade guirá' ca hombre ni guyuu lu guidxilayú» (Núm. 12:3). Peru nabé nagana dxiiña' bidii Dios laabe ora bisaana lu nabe gú'yabe guidxi Israel. Nee zanda gúnibe dxiiña' que la? Zanda, ne gunda bínibe ni, purtí' gucané espíritu santu laabe para gúcabe ni riguixhená, juez, bicaabe caadxi libru ni zeeda lu Biblia ne gúcabe ti xaíque, dede bínibe caadxi milagru. Biblia na: «Ne bietenaládxibe de ca dxi ni ma' gudidí', de xpínnibe Moisés: «Para nuu Ni bilá laatu lu nisdó' ne ca pastor stí' ca dendxu' stí' ya'. Para nuu Ni guluu espíritu santu Stí' luguiabe ya'» (*Isaías 63:11*). Peru bidxiichibe ti biaje purtí' ma'qué ganda gúnibe guirá' ca dxiiña' gucuaabe (Núm. 11:14, 15). Xi bíní' Jiobá óraque ya'. Gulee caadxi espíritu luguiá' Moisés ne guluuni luguiá' 70 hombre para gacané laabe né dxiiña' que (Núm. 11:16, 17). Xi zanda guiénenu né ca diidxa'ri' ya'. Necá biiya' Moisés casi ora qué zanda guni dxiiña' que la? cadi stúbisibe cayúnibe ni. Stí 70 hombre que laaca cadi stúbisica' chigúni-ca' dxiiña' gucuaaca'.

⁴ Gucuaa Moisés bia' espíritu suntu ni caquiiñe' para ganda guni dxiiña' ni bidiibe laa. Necagua xha Dios laabe caadxi espíritu, gúparube bia' caquiiñebe, ne laaca gupa 70 binnigola que bia' caquiiñeeca'. Jiobá rudii laanu espíritu bia' caquiiñenu para gúrinu dxiiña' ni gucuaanu. Sicarí cayabi Biblia laanu: «Qué riaana dxí be de cu' be ndaaya laanu» ne «ruchá Dios ladxidó'[no] de» espíritu santu (Juan 1:16; 3:34).

⁵ Nee cadí'dilu' lu xiixa guendanagana la?
Nee cadale ca dxiiña'stilu'ra zidi'di'dxi ne caquii-
ñe' cueelu' ima tiempu para laacani la? Nee cá

íquelu' gudiilu' ni gó binnilídxilu', gusiidilu' laaca' de Dios, pero cayaca nagana para lii gu'nu' ni purti' huaxié' ni runi ganarlu' o purti' huaralu' la? Ñee rúniliu'stale dxiiña' lade ca binni ridagulisa la? Pa cadí'dilu' lu tobi de cani ma' bize'tenu ca, gunna zudii Dios lii espíritu sti' para gudiini lii stipa ni caquiiñelu' (Rom. 15:13).

Gucané espíritu santu Bezalel

⁶ Guidú'yanu sti modo racané espíritu santu laanu ora guidú'ndanu historia sti' Bezalel, ti hombre ni bibani ca dxi sti' Moisés. Biblia na: «Óraque gudxi Moisés ca xiñi' Israel: "Jiobá ma'bicaa ridxi Bezalel xiñi' Urí xiñi' Hur, ni za de tribu sti' Judá. Ne bidiibe laa espíritu sti' Dios para gapa guendabiaani', gapa guendariene ne ganna stale ne ganna guni intiica cosa raca lu ná binni["]» (*Éxodo 35:30 ne 31*). Bisaana Dios lu nabe gúnibe guirá' ni zaquiiñe' ndaani' tabernáculo que. Ñee maca nanna Bezalel guni dxiiña' ri' dede ante la? Zándaca, pero últimu dxiiña' ni nánnanu bí'nibe nga ladriu para ca egipciu (*Éxo. 1:13, 14*). Yanna, ximodo gunda bí'nibe dxiiña' nagana bidii Dios laabe que ya'. Purti' gúpabe «espíritu sti' Dios» ni bidii laabe guendabiaani', guendariene, gánnabe stale ne gánnabe gúnibe intiica cosa raca lu ná' binni. Pa nánnabe gúnibe ca dxiiña' que o pa co' la? biquiñe' Dios stipa sti' para gucané laabe ne Oholiab. Guirópacabe bí'nicabe xhiiñacabe jneza ne bisiidicabe xcaadxi binni guni dxiiña', purti' Jiobá guluu ndaani' ladixidó'cabe gusiidicabe.

⁷ Xi sti cosa rusihuinni gucané espíritu sti' Dios Bezalel ne Oholiab. Nabé sicarú modo guca ca dxiiña' que purti' neca ma' gudiíd'i gaayu' gayuua iza caquiiñeru' binni cani (2 Cró. 1:2-6). Ne galán gánnanu qué fiuni ca hombre ri' ni runi stale binni ni riuula'dxi' gusisácabé laaca'. Ni jma guyuulá'dxicabe nga gusisaca binni Jiobá (*Éxo. 36:1, 2*).

⁸ Ca dxi stinu ri', nuu stale dxiiña' ni raca ndaani' xquidxi Dios ra caquiiñe' binni napa

6-8. 1) Xi dxiiña' gucané espíritu santu Bezalel ne Oholiab guni. 2) Ximodo nánnanu gucané espíritu santu Bezalel ne Oholiab. 3) Xiñee riguu ejemplu' sti' Bezalel gana laanu.

gracia para guni cani, casi ora cuí ti Yoo sti' Reiu, gaca imprimir libru ne revista, gata chaahui' ximodo gaca ti guendaridagulisa ro', gacanécabé ca xpinni Cristu ora guizaaca xiixa desgracia ne gusiéncabé ca doctor ca xi riní' Biblia de rini. Nuu biaje riquiñecabé cani guzá scuela ro' para ca dxiiña' ri', pero jma stale biaje riquiñecabé binni ni huaxié' nanna de laacani. Necá zacá racané espíritu santu laacabe para gúnicabe xhiiñacabe jneza. Xi zanda guininu de laanu ya'. Ñee riní' íquenu qué zanda gúninu xiixa dxiiña' ndaani' xquidxi Dios purti' rábinu nuu xpinni Cristu jma nanna que laanu la? Pa zacá ni la? galán guietenaládxinu zanda gacané espíritu santu laanu para gúninu intiica dxiiña' gudii Jiobá laanu ndaani' xquidxi.

Gucané espíritu sti' Dios Josué para guni xhiiña' jneza

⁹ Guininu de sti hombre ni bibani tiempu sti' Moisés ne Bezalel, laaca gucané espíritu sti' Dios laa. Cadi xadxí de biree ca israelita Egipto, bicaalú guidxi sti' Amaleq laacabe neca qué fiúnicabe laaca' gastí'. Necá qué huayuu dxi tindenécabé sti guidxi, gupa xidé bidxiilúcabé laaca', neca ngue nga primé guendaridinde gúpacabe despúe de bireecabe de Egipto (*Éxo. 13:17; 17:8*). Peru caquiiñe' guidxela tu gaca xaíque stícabé. Tu laa guni dxiiña' ri' ya'.

¹⁰ Gulí Jiobá Josué para laani, pero cadi purti' maca huayácabe xaíque sti' ca binni que ante. Josué qué ganna di' gastí' de guendaridinde, purti' ni gúcabe nga ti esclavu ni bíni' ladriu Egipto. Ne dxi guyuucabe lu desierto, maná nga bitópacabe guirá' dxi para gobe. Dxandí' guca bixhozebii-dabe Elisamá ti hombre ni nanna tinde, purti' guca xaíque lu tribu sti' Efraín ne laaca gúcabe xaíque sti' ti grupu de 108,100 hombre (Núm. 2: 18, 24; 1 Cró. 7:26, 27). Peru qué nibí Dios laabe nin xiñibe Nun. Gúdxibe Moisés cuí Josué para gaca xaíque sti' ca soldadu que ne zacá gunduuxebé ca xhenemígube. Casi guidubi ti dxi

9. Xi guendanagana bidxaagalú ca israelita bireesica' de Egipto, ne tu caquiiñecabé.

10. Xiñee gunda bíni' ganar Josué ne ca israelita ti guendaridinde.

gudíndecabe. Cumu bizuuba' Josué diidxa' ne yenándabe ni gudxi espíritu santu sti' Dios laabe la? bín'i' ganar Israel guendaridinde que (Éxo. 17:9-13).

¹¹ Guti si Moisés guca Josué xaíque sti' ca israelita ne bidii espíritu santu laabe guendabiaaní' (Deu. 34:9). Espíritu santu qué ñacané dí' laabe para ñácate ti ni riguixhená ne ñúnibe milagru casi gucaneni Moisés, pero gucaneni laabe para gácate xaíque sti' Israel ne guni ganárcabe guidxi Canaán. Ejemplu sti' hombre ni bizuuba'diidxa' rí' zacaneni laanu pa guiní' íquenu qué zanda gúñinu xiixa dxiiña' gudiicabe laanu purti' rábinu huaxié' nánnanu de laani. Peru pa guzú'banu stiidxa' Dios ne gúñinu ni gabi espíritu santu laanu, zanda gacaneni laanu cásica gucaneni Josué (Jos. 1:7-9).

«Espíritu sti' Jiobá gucaneni Gedeón»

¹² Guti si Josué bidiiru' Jiobá espíritu sti' para gudii stipa ca xpinni ni bizuuba' stiidxa'. Libru sti' Jueces ruzeete' de caadxi hombre ni bidxibi, pero gúcaca' nadxibalú ora gucuaaca' espíritu santu (Heb. 11:34). Tobi de laacabe nga Gedeón. Biquiñe' Dios espíritu sti' para gucané laabe tíndebe pur guidxi Israel (Jue. 6:34). Ca xpinni Gedeón jma huaxie'ca que ca binni de Madián. Neca zaqué la? biiya' Jiobá stáleru' binni napa Gedeón, ngue runi chupa biaje gúdxibe laa gudxigueta' xcadxi binni. Ngue runi casi ñaca ti israelita nucaalú 450 madianita (Jue. 7:2-8; 8:10). Xiñee bín'i' Jiobá zaqué ya'. Para cadi gudxibacabe laca laacabe ne guiní'cabe bín'i' ganárca be pur stipa stícabe o purti' nabé nuu xpiaanicabe.

¹³ Guní' ique nuulu' lade ca soldadu sti' Gedeón ante guzulú guendaridinde que. Nee ñuni sentirlu' zalalu' lade ca xpinni Gedeón que purti' puru si soldadu nadxibalú nuu raqué la?

11. Ximodo zanda gúñinu xhiiña' Jiobá jneza cásica bín'i' Josué.

12-14. 1) Xi rizi'dinu ora gánnanu bín'i' ganar 300 israelita guirá' binni de Madián. 2) Ximodo biquidxi Jiobá fe sti' Gedeón. 3) Xiñee zanda guni crenu zacané Jiobá laanu ca dxi ri'.

O nidxfíbilu' pur ni ñándaca nizaaca. Laanu nánnanu bín'i' cré Gedeón zacané Jiobá laa purti' bizuubabe diidxa'. Biblia na: «Huaxhinni que gudxi Jiobá laabe: "Biasa, ne biete ra nuu campamentu ca purti' ma' bidiee' laacabe lu nalú'"» (*Jueces 7:9*). Qué nidxiichi dí' Jiobá ora gunaba' Gedeón laabe gusihuínne zacanebe laa (Jue. 6:36-40). Ni bínibe nga biquídxibe fe sti' Gedeón.

¹⁴ Qué ziuu dxi guirá poder sti' Jiobá para gané ca xpinni. Zanda gacanebe ca xpínnibe lu intica guendanagana ni cadí'dica'. Dede zanda iquiiñebe tuuxa ni rulu' huaxié' nanna ne huaxié' nadipa' para gulabe ca xpínnibe. Nuu biaje zuni sentirnu jma stale ca binni ni cuaalú laanu o nabé nagana ra cadídinu. Xi gúñinu óraca ya'. Nécape' qué zanda guinábanu ti seña de guibá' casi bín'i' Gedeón, zanda gulú' Jiobá laanu xi gúñinu ne quixhedxibe ladxido'no ra iquiiñebe Stiidxabe ne xquídxibe ni cayuni ni na espíritu stibe (Rom. 8:31, 32). Guirá' ni ma' guní' Jiobá chiguni ruquidxi cani fe stinu ne rucaa cani laanu guni crenu zacanebe laanu guirá' ora.

«Guyuu espíritu sti' Jiobá [...] luguiá' Jefté»

¹⁵ Guidú'yanu sti ejemplu. Gudi'di' si iza, dxi bicaalú Israel ca ammonita, «guyuu espíritu sti' Jiobá [...] luguiá' Jefté». Cumu nabé racaládxibe guni ganarbe guendaridinde que ti gusisaca binni Dios la? bidii stiidxabe Jiobá zúnibe xiixa para laa. Gúdxibe Dios zudiibe laa primé binni ni guidxaagalú laabe despué de guni ganarbe guendaridinde que. Dxi bibiguétabe de bín'i' ganarbe ca ammonita, ni bidxaagalú laabe óraque nga xiiñidaapabe (Jue. 11:29-31, 34). Nee bidxagayaa Jefté ora biiya' primé ni yedxagalú laabe nga xiiñidaapabe la? Zándaca co', purti' qué gáparube jma xiiñibe. Neca zaqué, bínibe ni bidii stiidxabe ne yenebe xiiñibe Siló para guni xhiiña' Jiobá ndaaní' santuaríu sti'. Cumu laaca bín'i' adorar xiiñidaapabe Jiobá de guidubi ladxidó' la? biene naquiiñe' gaca ni gunf' bi-

15, 16. Xiñee guná xiiñi' Jefté guni ni bidii stiidxa' bixhoze, ne xi riziid' cani napa xiiñi' de laani.



*Ejemplu stitu zanda gacaneni
ca xiiñitu para gúnica' ni na Jóbá*

xhoze. Sicarí' na Biblia: «Peru xiiñidxaapabe gu-dxi laabe: "Bixhozehuiine", pa ma' bidii stiidxa-lu' Jóbá, bi'ní' ni ma' guni'lu' ca, purti' Jóbá ma' gucané lii para gusabanalú' ca xhenemígulu', ca xiiñí' Ammón»» (*Jueces 11:36*). Espíritu stí' Jóbá gucané guirópacabe para gúnicabe ni guní-cabe.

¹⁶ Xiñee gupa xiiñí' Jefté stale fe para gunda bi'ní' ni guní' bixhoze ya'. Zándaca bí'nibe ni purti' biiyabe bí'ní' bixhózebe ni na Jóbá né stale gana ne bí'ní' adorar laabe de guidubi ladxido'. Xi zanda guiziidi' cani napa xiiñí' de laabe ya'. Naquiiñe' gácacabe ti ejemplu galán para ca xii-nicabe. Naquiiñe' gu'ya' ca xiiñitu runi cretu ni cusiiditu laaca'. Naquiiñe' gudiicabe cuenta dxandi' nadxiitu Jóbá de guidubi ladxido'to. Cadi pur ca oración si ni rúnitu ne modo rusiiditu laacabe de Jóbá, sínunque pur modo rúnitu ni na Jóbá lu xquendanabáni. Ora gú'yacabe ni rúnitu zucaani laacabe guiale de ndaaní' ladxi-dó'cabe guni adorárcabe Jóbá. ¡Nabé zusieche' nga ladxido'to!

«Espíritu stí' Jóbá guyuuni» loguiá' Sansón

¹⁷ Ejemplu stí' stí hombre ni gucané espíritu santu laa nga Sansón. Ca dxi bibánibe biaba ca israelita lu ná' ca filisteu. «Despué, bicaa espíri-tu stí' Jóbá laabe» gulabe laaca' (*Jue. 13:24, 25*).

17. Xi bí'ní' Sansón pur gucané espíritu stí' Dios laa.

Bidiini stipa Sansón guni stale cosa ni qué ñuni tutiica binni. Ti biaje bicusdxi ca filisteu caadxi israelita para guinaazeca' laabe. Peru «espíritu stí' Jóbá guyuuni luguiabe, ne ca doo ni liibibe que beeda gácacani casi hilu de linu ni ma' gu-ya'qui', ngue runi, casi ñaca biá ca grillete que lu nabe» (*Jue. 15:14*). Despué binítibe stipa sti-be purti' qué niguixhe íquebe ñúnibe ni jneza, neca zaqué bidii Jóbá stipa laabe últimu biaje purti' gúpabe fe (*Jue. 16:18-21, 28-30; Heb. 11:32-34*). Espíritu stí' Dios gucaneni Sansón pur ca dxiiña' ni bidii Dios laa guni. Nécape' qué zudii Jóbá poder laanu para gúninu cani bi'ní' Sansón, rudii ejemplu stibe stipa laanu. Ximodo ya'.

¹⁸ Cásica Sansón, laaca nánnanu zanda

18, 19. 1) Ximodo riguu historia stí' Sansón gana laanu. 2) Ximodo huayacané ejemplu stí' ca binni ni bizé'tenu lu tema ri' laanu.

Xi biziidilu' ora bí'ndalu' modo gucané espíritu stí' Dios ca binni ri':

- Moisés
- Bezalel
- Josué
- Gedeón
- Jefté
- Sansón

gacané espíritu santu laanu. Zanda gacaneni laanu guzú'banu stiidxa' Jesús, purt' laa biseenda' laanu «chi güi né [nu] binni stiidxa be» (Hech. 10:42). Zándaca gaca nagana para laanu gúrinu dxiiña' ri', peru riéchenu stale purt' ruidii Dios laanu espíritu santu sti' para gacané laanu gúrinu guirá' ni canábabe laanu. Runi sentirnu cásica bi'ní sentir Isaías ni riguixhená, laa guní': «Jiobá, Dios ni jma nandxo' biseenda' naa» (Isa. 48:16). Biquiñe' Dios espíritu sti' para biseenda' laanu. Nga runi, naquiiñe' chu'nu nayeche' purt' nánnanu zacané Jiobá laanu cásica gucanebe Moisés, Bezalel ne Josué. Iquiñenú «espada ni ruidii» espíritu santu laanu «nga nga stiidxa Dios», purt' nánnanu

Espíritu santu zanda gudii stipa laanu cásica bidiini stipa Sansón para gúrinu xhiiña' Dios



zudii Dios stipa laanu cásica bífibe né Gedeón, Jefté ne Sansón (Efe. 6:17, 18). Ne pa guidxaagalunu guendanagana la? guinábanu Jiobá gudii stipa laanu cásica bidiibe ni Sansón para gúrinu xhiiñabe.

¹⁹ Nánnanu zaguu Jiobá ndaaya' guirá' cani guni adorar laabe sin guidxibi. Raca fe stinu jma naguidxi ora gudiñu lugar gabí espíritu santu laanu xi gúrinu. Lu sti tema ca zadú'yanu caadxi ejemplu ni zeeda lu Stiidxa' Dios ni gucuá lu diidxa' griegu. Nabé zabeendunu ni galán ora guidú'yanu modo gucané espíritu santu ca xpinni Dios ni bibani lu primé siglu, cásica ni bibani ante gaca saa Pentecostés ne zaqueca cani bibani despué.

CANI BI'NI' NI NA ESPÍRITU STI' DIOS LU PRIMÉ SIGLU NE CANI CAYUNI NI YANNA

«Peru [espíritu] que si runi irá ni, purti cada tobi ruidii be laa ni racala'dxi be.»
(1 COR. 12:11)

LU SAA sti' Pentecostés guca caadxi cosa galán. Dxi que bisaba Dios espíritu santu sti' luguiá' ca xpinni (Hech. 2:1-4). Dede dxi que ma' gadxé modo biquiñe' Dios espíritu sti' para gabí ca xpinni xi naquiiñe' gúnica'. Lu últimu tema ca bidú-

1. Xi chiguizidinu lu tema ri'.

ndanu ximodo gucané espíritu ca xpinni Dios ni bizuuba' diidxa' para gúnica' caadxí dxiiña' nagana. Yanna, ximodo nga gadxé modo gucané espíritu ca xpinni Dios ni bibani dxique' ne cani bibani despué de primé siglu ya'. Ximodo racané espíritu santu ca xpinni Cristu tiempu ri' ya'. Guidú'yanu.

«Rarí nuua para gune ni na Dios»

² María nuu lade ca binni ni biaba espíritu santu luguiá' ndaaní guidxi Jerusalén (Hech. 1:13, 14). Peru cadi deru' primé biaje ngue gú'yabe ca milagru ni runi espíritu stí' Dios. Raca jma de treinta iza, dxi nácarube ti binnidxaapa', biquiíñe' Dios espíritu santu para bi'ní' ti milagru ti ganda gacaxiiñibe Xiiñí Dios ni nuu guibá' (Mat. 1:20).

³ Xiñee gulí Jiobá María para milagru rí' ya'. Zánnanu xiñee ora guidú'yanu xi bicabi María ángel stí' Dios: «Rarí nuua para gune ni na Dios. Zaa gaca casi nou'ca» (Luc. 1:38). Né ni bicábibe rí' bisihuínnibe xi nuu ndaaní ladxido'be: nuube listu para gúnibe ti dxiiña' ni chigudii Dios laabe. Qué nizaalá'dxibe xi guiní' ique ca xpecínube ora gú'yaca' ma' nacaxiiñibe, ne laaca qué nidxíbibe pa pur laani ma' qué niná José nichaganá' laabe. Laabe guní' be nácate ti gunaa ni runi ni na Jiobá, zacá bisihuínnibe ruuyabe Dios casi Xpixuaanabe.

⁴ Nuu tiru laaca rudiicabe laanu xiixa dxiiña' ndaaní xquidxi Dios ne ruluí' qué zanda gúninu cani. Ora guizaacanu zacá, galán guinabadiidxanu laca laanu: «Ñee rune' cré zacané Jiobá naa para gune' dxiiña' stí' modo raca-lá'dxibe la? Ñee rusihuinne' dxandí' rapa' gana gune' ni rinábabe naa la?». Naquiiñe' gánnanu zudii Jiobá espíritu stí' laanu pa guni crenu laa de guidubi ladrido'no, pa gú'yanu laabe casi Dios ni runi mandar laanu ne pa guzú'banu stiidxabe (Hech. 5:32).

Gucané espíritu santu Pedru

⁵ Cásica María, apóstol Pedru laaca maca biiya' ca dxiiña' ni huayuni espíritu santu ante gaca saa Pentecostés lu iza 33. Bidii Jesús poder laabe ne xcadxi apóstol para ganda

2. Xi milagru maca biiya' María bi'ní' espíritu santu.

3, 4. Xi bi'ní' María ora bidii Dios laa ti dxiiña', ne ximodo zanda chinándanu ejemplo stibe.

5. Ximodo gucané espíritu santu Pedru ante gaca saa Pentecostés lu iza 33.

cueecabe demonio luguiá' binni (Mar. 3:14-16). Nece qué ruzeetepe' Stiidxa' Dios stale de laani, ruluí' si biquiíñe' Pedru poder ca para cuee demonio luguiá' binni. Ne dxi gudxi Jesús laabe sabe lu nisadó' stí' Galilea, gunda bíf-nibe ni purti' gucané espíritu santu laabe (**biinda' Mateo 14:25-29**). Racá ridú'yanu gunda bi'ní' Pedru milagru purti' gucané espíritu santu laa. Peru mayaca gacané espíritu stí' Jiobá laabe ne xcadxi apóstol para ganda gúnicabe xcadxi cosa.

⁶ Dxi guca saa stí' Pentecostés, gucané espíritu santu apóstol Pedru ne xcadxi discípulo para gunda guni'ca' stiidxa' ca binni de stí guidxi ni beeda Jerusalén. De raqué bizulú guni'né Pedru guirá' ca binni ni bidagulisa raqué (Hech. 2:14-36). Ante guicaabe espíritu santu bí'nibe stale cosa sin guini' íquebe ne laaca bidxíbibe binni. Despué gúcabe ti hombre nadxibalú ne bicheechebe diidxa' nece guyyu tu gudxi laabe cadi gúnibe ni ne nece guzanándaca' laabe (Hech. 4:18-20, 31). Dios biquiíñe' espíritu stí' para gudxi laabe ca cosa ni qué gánnabe (Hech. 5:8, 9). Dede bidii Dios laabe poder para gundísabe ti gue'tu' (Hech. 9:40).

⁷ Ante gaca saa Pentecostés, maca biene Pedru caadxi de ca cosa bisiidi' Jesús (Mat. 16: 16, 17; Juan 6:68). Peru nuu caadxi cosa ni ca'rú' guiene chaahuibe. Tobi de laacani nga ziasa Jesús né ti cuerpu de espíritu despué de chonna gubidxa de guti, ne stobi ni ca'rú' guiene chaahuibe nga pa guibá' chichuu Reunu stí' Jesús (Juan 20:6-10; Hech. 1:6). Pedru qué ñene pa nuu caadxi de ca binni de guidxilayú ni zácaca' espíritu para chiguni mandárneca' Jesús guibá'. Pora gunda biénebe cani ma' bizé'tenu ca ya'. Despué de guyuunísabe pur espíritu santu ne bibibe para chebe guibá'.

6. Ximodo gucané espíritu stí' Dios Pedru lu saa Pentecostés ne ximodo gucaneni laabe despué.

7. Guná' nga caadxi cosa bisiidi' Jesús ni biene chaahuí' Pedru despué de bibí pur espíritu.

⁸ Despué de gucuaa ca discípulo sti' Jesús espíritu santu la? jma biénecabe guirá' ni bisiidi' Jesús ante. Gucané espíritu santu laacabe guacaacabe Stiidxa' Dios lu diidxa' griegu, ne luni bicaacabe xi guirá' cosa sicarú nagui-xhe ique Jiobá guni (Efe. 3:8-11, 18). ¡Nabé si-carú ni ribeendunu pur ni bí'nicabe! Ca dxi stinu ri', cásica cani bibí ne cani zeeda gaca de «xcaadxi dendxu» laaca zanda guidú'ndanu ne guiénenu guirá' ni zeeda lu Biblia (Juan 10:16). Nee rusihuínninu rusicánu guirá' ni cusiene espíritu laanu de Stiidxa' Dios la?

Gucuaa Pablu espíritu santu

⁹ Bia' ti iza despué de guca saa sti' Pentecos-tés, guyuu ti hombre ni gucuaa espíritu santu: laabe nga Saulo, ni binibiá'cabe casi apóstol Pablu. Gucané espíritu santu laabe de stale modo, ne dede nagasi ribeendunu stale cosa galán de caadxi cosa bí'nibe. Tobi de ca modo gucané espíritu santu laabe nga ora bi-caabe catorce libru ni zeeda lu Biblia. Ne cásica bizaaca né Pedru, gucané espíritu santu Pablu para guiene chaahui' ximodo chiguibani ca binni ni che' guibá' ne gusínebe xcaadxi binni de laani. Laaca bidiini poder laabe para gusiándabe binni huará, cueebe demonio luguiá' binni ne guindísabe gue'tu'. Peru laaca gucané espíritu laabe para gúnibe ti dxiiñá' jma risaca. Ca xpinni Dios ni nabani yanna, laaca rudii Dios espíritu laaca' para ganda gucheecheca' diidxa', neca qué ricaanu ni casi modo bidiibe ni ca apóstol.

¹⁰ Dxi guyuu Pablu Chipre gucuaa espíritu santu para gunda bidxiilú ti bruju. Nabé guyuula'dxi' procónsul ni runi mandar lu isla que ni guní' Pablu, ngue runi «bini cre ne bidxagayaa de stiidxa [Jiobá]» (Hech. 13:8-12). Racá ridú'yanu biene Pablu caquiiñe' gapa es-

8. Xi zanda guiene ca xpinni Cristu ni bibí pur espíritu santu ne cani zeeda gaca «xcaadxi dendxu».

9. Xi gunda bí'ní' Pablu pur espíritu santu.

10. Ximodo gucané espíritu santu Pablu para bi-cheeche diidxa'.

píritu santu para gudiini poder laa ti ganda gucheeche diidxa' (Mat. 10:20). Ngue runi, despué gúdxibe ca xpinni Cristu de Éfeso guni orarca' pur laabe ti ganda gacané Dios laabe gánnabe xi gábibe binni (Efe. 6: 18-20).

¹¹ Necá gucané espíritu santu Pablu para gucheeche diidxa' xiixa lugar, nuu lugar ra qué niná espíritu ca nucheechebe diidxa'. Guirá' ra guzabe de misioneru qué nusaana de ñacané espíritu sti' Dios laabe (Hech. 13:2; *biinda' Hechos 16:6-10*). Ca dxi stinu ri', ca-quiiñeru' Jiobá stipa sti' para ganda guireeche diidxa'. Ne laanu, cásica Pablu, laaca ruzú'banu stiidxa' Dios ora rusí'dinu binni de laabe né stale gana sin guidxíbinu. Necá ma' gadxé modo riquiñé' Dios espíritu sti' para gacané laanu yanna, zanda guni crenu cayacane-be laanu para gusí'dinu binni ni racala'dxi' gacaná de Dios (Juan 6:44).


«Adxé adxé gracia ricaa cada tobi»

¹² Pa ma' bidi'nu xquendanabáninu Dios la? nabé riu'nu gana ora guidú'ndanu guluu Jiobá ndaya' ca primé xpinni Cristu

11. Ximodo gucané espíritu sti' Dios Pablu.

12-14. Bisiene xiñee gadxé gadxé modo runi espíritu sti' Dios dxiiñá' luguiá' ca xpinni.

Gucané espíritu santu Pablu para gudxiilú ti hombre ni nuu ti demonio luguiá'



ni bibani lu primé siglu. Guidú'yanu xi guní' Pablu de ca gracia ni rudii espíritu lu carta ni bicaa ra nuu ca binni de Corinto: «Adxé adxé gracia ricaa cada tobi ni runi cre Cristu, peru tobi si [espíritu santu] rudii irá cani. Zaquea *adxé adxé modo guni nu xhiiña Señor*, peru tobi si Señor nuu. Laca adxé adxé ni runi cada tobi de laanu, peru tobi si Dios racané laanu guni nu irá ni» (1 Cor. 12:4-6, 11). Lu textu ca guní' Pablu gadxé gadxé modo racané espíritu santu cada xpinni Dios para gúnica' xiixa ni racalá'dxibe. Ca «dendxu huiini» sti' Cristu ne «xcaadxi dendxu» laaca racané espíritu santu laaca' (Luc. 12:32; Juan 10:16). Peru naquiiñe' gánnanu cadi ti modo si racanenii cada tobi de ca binni ridagulisaas.

¹³ Casi ca binnigola la? laaca espíritu santu nga racané para guihuinni tu laa zanda guicaa dxiiña' ca (Hech. 20:28). Peru cadi guirá' ca xpinni Cristu ni bibí para che' guibá' nga randa rácaca' binnigola. Racá ridú'yanu gadxé gadxé modo racané espíritu santu cada tobi de ca binni ridagulisaas.

¹⁴ Jiobá racané ca xpinni Cristu ni bibí gánnaca' ma' náccaca' xiiñi' Dios. Para ganda gúnibe nga riquiñebe espíritu santu, ngaca nga espíritu ni biquiñebe para bisibánibe tobi lucha Xiiñibe para guibani guibá' sin gati (*biinda' Romanos 8:11, 15*). Laaca laani nga biquiñebe para biza'be guibá' ne Guidxilayú (Gén. 1:1-3). Ne laaca espíritu ca nga gucané Bezalel para bi'ni' tabernáculo que, laaca laani bidiini stipa Sansón para guni stale cosa ni qué ñianda ñuni tutiica si binni, ne laaca laani nga gucaneni Pedru para guzá lu nisa. Peru galán guiene chaahuinu ndí': gadxé nga gacané espíritu santu tuuxa ne gadxé nga gaca tuuxa ti binni ni bibí pur espíritu santu. Tobi de ca dxiiña' ni runi espíritu santu nga ribini ca xpinni Cristu ni che' guibá' ne Jiobá nga riní' tu laa cuí espíritu ca.

¹⁵ Casi ma' bizé'tenu ca, ma' xadxí nga de

15. Bisiene xiñee zadxiña dxi ma' qué zabí Dios binni pur espíritu santu para che' guibá'.

napa Jiobá xpinni ndaaní' Guidxilayú ri' ne riquiñebe espíritu stibe para gacanebe laaca' de stale modo. Peru lu Pentecostés sti' iza 33 que nga bizulú cabibe hombre ne gunaa pur espíritu para checa' guibá', ne naquiiñe' gánnanu zadxiña dxi gusaana de gúnibe ni. Necá zacá, zudiiru' Dios stipa sti' ca xpinni para cadi gusaana de gúnica' ni nabe.

¹⁶ Xi cayuni ca xpinni Jiobá partí' racané espíritu santu laaca' ya'. Sicarí' na Apocalipsis 22:17: «Na [espíritu santu] ne xheela Dendxu huiini que: "Gudá". Ne ni guna diaga la? infí": "Gudá". Ni cayati nisa la? gueda gué nisa ni rudii enda nabani sin quixe gastí». Racané espíritu ca xpinni Cristu para guni invitarca' guirá' clase binni gueeda gué nisa para guicáa guendanabani ni cudii Jiobá. Ca xpinni Cristu ni bibí nga zaniru' lu dxiiña' ri' ne racané cani zeeda gaca de xcaadxi dendxu' laaca'. Guiropa'grupu ri' racané espíritu santu laaca'. Pa chécate guibá' o pa chiguibánicabe lu Guidxilayú ri' ma' bidiicabe laacabe Dios ne ma' guyuunísacabe «lu [labe], ne lu lá Xiiñi[be] ne lu lá espíritu santu» (Mat. 28:19, NM). Ne guirácabe rudiicabe lugar gacané espíritu santu laacabe ne gusihuínncabe guenda stini lu xquendanabánicabe (Gál. 5:22, 23). Guiropa'grupu ri' racané espíritu sti' Dios laaca' para chu'ca' nayá ne guibánica' modo riuala'dxi' Dios (2 Cor. 7:1; Apo. 7:9, 14).

Cadi gusaana de guinábanu espíritu santu

¹⁷ Casi cani che' guibá' ne cani chiguibani lu Guidxilayú ri', rudii Jiobá laacabe «enda nandxó' sti» ti cadi gusaana de gúnicabe xhiiñabe ne zacá guicaacabe guendanabani (2 Cor. 4:7). Nuu tiru runi burla binni laanu xiñee qué rusaananu de gucheechenu diidxa' nacubi ne galán sti' Reinu. Guietenalá'dxinu, pa guiní'cabe mal de laanu o «cu' dí cabe»

16. Xi cayuni ca xpinni Cristu partí' cayacané espíritu santu laaca'.

17. Ximodo rusihuínncabe nápanu espíritu sti' Dios.



Dios rudii espíritu sti' guirá' ca xpinni: cani che' guibá' ne cani chiguibani lu Guidxilayú

laanu rúnicabe ni «tisi xpinni Cristu» laanu. Peru pa gucheecherunu diidxa' la? ziu'nu nayeche' ne zusihuínninu «nuu né [espíritu] sti Dios ni nandxó» laanu (1 Ped. 4:14).

¹⁸ Pa guinábanu Dios espíritu suntu de guidubi ladrido'no la? zacaanu ni ne zacaneni laanu gúrinu xiixa dxiiña' neca huaxié' nánnanu de laani ne laaca zacaneni laanu gúrinu ni na Jiobá de guidubi xhiálmanu. Sicari' na Biblia: «Cadi stubi tu nuu tu, sínuque nuu Dios cayacané laatu ului'la'dxi tu guni tu ni na, ne zaqueca ti ganda guni tu ni». Naquiiñe' gúrinu ni na conseju ri': «Laucaala'dxi guni tu ni jneza, dede dxi ilá chaahui tu. Lagaca nadó' ne laidxibi». Ximodo zanda gúrinu nga ya'. Ra gudi'nu lugar gacané espíritu suntu laanu ne ra gúrinu stipa pur gusí'dinu binni «diidxa ni rudii enda nabani», ne qué chu' dxi gusaana de gúrinu ni (Fili. 2:12, 13, 16).

¹⁹ Pa guni crenu zacané espíritu suntu laanu la? zanda gúrinu intiica dxiiña' guicaanu

18, 19. Ximodo racané Jiobá laanu pur espíritu sti', ne xi naquiiñe' quixhe íquenu gúrinu.

ndaani' xquídxibe, zúninu stipa pur gúrinu cani jma galán ne zanábanu Jiobá gacané laanu (Sant. 1:5). Laabe zacanebe laanu para guiene chaahuinu Stiidxabe, gudxí'lunu ca guendanagana gápanu ne gucheechenu diidxa'. Ora guinábanu Dios gudii laanu espíritu sti', guietenaládxinu conseju ri': «Lainaba lu Dios, zudii laatu. Lauyubi, zadxela tu. Lauxhidxi ná', zaxele chu' tu» (Luc. 11:9, 13). Cadi gusaana de guinábanu Jiobá gudii laanu espíritu sti' para gabi laanu xi naquiiñe' gúrinu, cásica huayúnibe né guirá' ca xpínnibe ni bibani dxiqué.

Ñanda nusiénelu' ni la?

- Ximodo zanda chinádanu ejemplu sti' María ti ganda guicaanu ndaaya' sti' Dios.
- Ximodo gucané espíritu sti' Dios Pablu.
- Ximodo rabi espíritu suntu laanu xi naquiiñe' gúrinu yanna.



Cadi gusaana de chu'lu' nayeche' purti' si huaralu'

BIXUI'LÚ casi birá gueela' ne mápeca caní' íquelu' pa ñanda si ma' nixhinni, nin nda' ca'rú' guzulú dxi. Nuulu' zacá purti' napa xidé guni huantarlu' ti yuuba' ro' stilu' o xiixa ni naga' guu lii triste. Zándaca guni sentirlu' casi bi'ní' sentir Job, laa guní' sicarf': «Jma galán gate' que tiide' ca yuuba' ri'» (Job 7:15, *Serafín de Ausejo*, 1975). Laga pa guindaa yuuba' stilu' stale izá ya'.

Ngape' nga ni bizaaca Mefibóset, xiiñí' Jontán, ti xhamigu rey David. Dxi nápabe gaayu' iza biábabe ne bichiita' ñeebe (2 Sam. 4:4). Despué guyuu tu guní' ma' bidxiidéchebe rey David ne binstibe caadxi de ca herencia stibe. Pa maca naná nuube purti' qué rizabe, jmaru' si naná guyuube né cani bí'nicabe laabe que. Peru qué nusaana de ñuube nayeche' neca huarabe, neca guní'cabe mal de laabe, zacá bisaanabe ti ejemplu galán para laanu (2 Sam. 9:6-10; 16:1-4; 19: 24-30).

Apóstol Pablo laaca guca sti ejemplu galán para laanu. Ti biaje bicaabe caadxi diidxa' ra guní'be: «Beeda ti yuuba lugui'a ya casi ra ridaabi guichi» (2 Cor. 12:7). Zándaca ti guendahuará ni gúpabe xadixí nga guichi ni bizeetebe que o ca binni ni guní' cadi dxandí' ti apóstol laabe. Modo tiica gúcani, bindaa guendanagana que ne gupa xidé bi'ní' huantarbe ni (2 Cor. 12:9, 10).

Yanna ri', nuu stale xpinni Dios ni cayacaná pur xiixa guendahuará ni qué rianda o cadí'dica' lu xiixa yuuba' ni riguu laaca' triste. Guzé'tenu de Magdalena. Dxi nápabe 18 iza, bihuinni hurabe

de *lupus eritematoso sistémico*, guendahuará ri' laca laani runinani xcuerpu binni. Laabe guní'be: «Nabé bidxibe' ora gunna' ni. Ra gudi'di' dxi guca xiroo guendahuará que, ne bizulú gupa' yuuba' ndaaní', biree gui'dxu' ndaaní' rúa' ne guca' huaraya' de tiroides». Yanna guzé'tenu de Izabela, laa qué rihuínnepe' xi guendahuará napa. Laabe cusiénebe: «Dede nahuiine' napa' depresión. Pur laani nuu tiru ridxibe' o ridxiche' nagueenda, qué randa ricaa' bi ne rusiuubani ndaane'. Rusidxágani naa ne riaana' sin stipa».

Naquiiñe' ganna binni nuu cosa ma' qué zanda guni

Ora huará binni, ora qué randa rizá o ma' qué randa ruuya' la? ma' qué riuu nayeche'. Ora nuu binni zacá, galán guuya' chaahui' xii nga cani ma' qué zanda guni. Peru nuu tiru raca nagaña para binni guiene ni. Magdalena guní': «Ra zidi'di' dxi ziyaca xiroo guendahuará stinne'. Nuu tiru rune' sentir ma' qué gapa' stipa nin para guiasa' lu cama. Ne cumu qué ganna' pora nga nuaa' galán la? raca nagana para naa quixhe xi gune'dede ante. Ni jma ruuti naa nga ma' qué randa rune' bia' ñuuladxe' lu xhiiña' Jibó casí bine' dxiqué».

Zbigniew cusiene: «Ra zidi'di' iza, *arthritis reumatoide* ni napa' ziyáxhani stipa naa, ne chaahui'chaahui' ziyuminani guirá'ca dxita lade'. Nuu tiru ora ma'dxa'gui guidubi lade', qué liica randa rune' gastí'. Rucaani naa guiní' ique' ma' qué zanda gune' huantar».

Yanna guininu de Barbara. Raca chupa chonna iza bihuinni nápabe ti tumor lu cerebru stibe ne ziyaca xiroo ni. Laabe guni'be: «Málasi rucha modu nuu lade'. Rirá stipa stinne', nabé riuuba' ique' ne raca nagana para naa guini' ique' lu ti cosa si. Ora bidiee' cuenta xii nga cani ma' qué zanda gune', gupa xidé bichaa' modo naba-ne».

Puru xpinni Jiobá ni ma' guyuunisa nga ca ejemplu bizé'tenu ca. Peru para laacabe ni jma risaca nga gúnicabe ni na Dios. Guirácabe runi crécabe zacané Dios laacabe ne ribeendúcabe stale cosa galán (Pro. 3:5, 6).

Ximodo racané Jiobá

Cadi naquiiñe' guini' íquenu ma' cadi caguunndaaya' Dios laanu ora nápanu xiixa guendahuará (Lam. 3:33). Guietenaládxinu guirá' ni bizaaca Job neca guca «ti hombre ni qué gapa donda ne runi ni jneza» (Job 1:8). Qué rutiidi' di' Dios binni lu guendanagana (Sant. 1:13). Guirá' guendahuará, cásica ni qué rianda ne cani runiná xquendabiaani' binni, zeeda cani lade guirá' cosa feu bisaanané Adán ne Eva laanu (Rom. 5:12).

Peru Jiobá ne Jesús qué rusaana de gacaneca' ca binni runi ni jneza (Sal. 34:15). Órape' jma cadi dinu ra nagana nga ridú'yanu dxandí' ni guní' salmista que de Dios: «Lii nga ti lugar ra zanda guiaapa', ti lugar ni nadipa' para naa» (Sal. 91:2). Nga runi, pa nápanu xiixa guendahuará ni qué zianda nagueenda, xi zanda gacané laanu para cadi gusaana de chu'nu nayeche' ya'.

Oración. Chinándanu ejemplu stí' ca xpinni Dios de dxiqué, zanda gula'nu ca guendanagana stinu lu ná' Bixhózenu ni nuu guibá' ora guni orarnu laa (Sal. 55:22). Ra gúrinu zacá, zata «dxí ladxidó'[no], ne ma qué zadxibi ladxidó'[no], ne zata dxí xquenda biaani[nu]» (Fili. 4:6, 7). Magdalena runi huantar guendahuará stí' partí' nabé runi orar Dios ne runi cré zacanebe laa para gu-dxiilú ni. Guni'be sicar': «Ora gabe' Jiobá guirá' ni nuu ndaaní' ladxiduá'rune'sentir galán ne rusiécheni naa sti biaje. Yanna huaxa ma' riene' ximodo nga guni cré binni Dios ra zidi'dí' dxi» (2 Cor. 1:3, 4).

Jiobá ricabi oración stinu ora rudii laanu espíritu santo para gudii stipa laanu, laaca riquiñe-be Stiidxabe ne ca xpinni Cristu. Cadi jneza di'

Rucheechecabe diidxa' neca nápacabe ti guendahuará ni qué rianda

«Ma' qué randa riree' lu calle stube', nga runi rireeniá' xheela'o tuuxa xpinni Cristu para chigucheeche' diidxa'. De memoria riziide' modo guinieniá' binni ne laaca rizide'ca textu ni guundaniá' laacabe.» (Jerzy, nacheepa' lú.)

«Rucheeche' diidxa' pur teléfono, laaca rucaa' carta ra nuu caadxi binni ni riuula'dxi' guiziidi' de Stiidxa' Dios. Ora ma' nexhe'ra hospital, rusaana' ti Biblia ne caadxi libru cue' cama stinne'. Ni rune'ri' racaneni naa guinieniá' binni.» (Magdalena, huarabe de lupus eritematoso sistémico.)



«Riuuladxe' gucheeche' diidxa' de yoo pur yoo, peru ora qué randa riree'la? rucheeche' diidxa' pur teléfono.» (Izabela, nápabe depresión clínica.)

cuézanu cuee Jiobá ca guendahuará stinu né ti milagru; pero zanda cuézanu gudiibe laanu guendabiaani' ne stipa ni caquiiñenu para gudxí'lunu intiica guendanagana (Pro. 2:7). Casi na Biblia, «Dios cayuni irá ni ne enda nandxósti» (2 Cor. 4:7).

Familia stinu. Pa nachá'huinu ne nadxiisanu ndaani' lídxinu la? zacané nga laanu guni huantarnu xiixa guendahuará. Necá nuu ca binnilí-dxinu para gacaneca' ora ma' cadidinu xiixa guendanagana, naquiiñe'gánnanu laaca racaná-cabe ne zándaca cayuni sentírcabe cásica cayuni sentirnu. Pa guni orar guidubi familia ca zacane-ni laacabe gatadxí ladxidó'cabe (Pro. 14:30).

Sicari' guní' Barbara de ti xiiñidxaapa' ne de xcaadxi dxaapahuini' ni nuu ra ridagulisaabe: «Nanna' zanácabe chigucheechenécabe naa dii-dxa'. Modo rucheechecabe diidxa' né stale gana rusiécheni ladxiduá». Zbigniew, xpinni Cristu ni maca bizé'tenu que nabé risaca para laabe modo racané xheelabe laabe. Sicari' guní'be: «Xheela' runi stale de ca dxiiña' ni raca ra yoo. Laaca racanebe naa gacua' lari ne rua'be portafo-

lio stinne' ora ma' ziuudu guendaridagulisa ne ora ma' zigucheechedu diidxa'».

Ca xpinni Cristu. Ora ma' nuunenu ca xpi-nni Cristu riu'nu gana ne ratadxí ladrido'no. Peru xi zanda guizaaca pa qué randa riuunu guendaridagulisa purti' huaranu ya'. Magdalena guní' sicari': «Ca binni ridagulisa runi grabarca' guendaridagulisa ca para gucaadia'ga' ti zacá gacaneni naa. Ca bizana' ne ca benda' xpi-nni Cristu nabé reeda gánnaca' naa para gú'yaca' ximodo gacaneca' naa. Laaca ruseendacabe carta ra nuaa' para uguucabe gana naa. Ra ganna' rietenaládxicabe naa ne riuucabe xizaa pur chuaa' galán racanécani naa gune' huantar».


Izabela guní' sicari': «Lade ca binni ridaguli-saa napa' stale bixhoze' ne jñaa' ni rucaadiaga naa ne rúnica' stipa pur guiéneca' naa. Ca binni ridagulisa nga familia stinne', ne ládecabe nga rune' sentir ratadxí ladxiduá' ne rune' sentir na-yeche'».

Cani cadiídí lu xiixa guendanagana cadi na-quiiñe' guixéleca' de xquidxi Dios, sínueque naquiiñe' gúnica' stipa pur guidagulisaaca' ne ca



«Riuuladxe'chiganna' binni sti biaje ne chiniá' tuuxa para guidú'ndanedu binni Biblia. Ca dxi rune' sentir nuaa'ga-lán, rucheeche diidxa'de yoo pur yoo.» (Barbara, napa ti tumor lu cerebru stí'.)

«Riniá' ti carpeta nasisi ra ri-guaad' caadxi revista. Ne ru-cheeche' diidxa'dede ora ma' qué ganda gune' huantar yuuba' stinne'.» (Zbigniew, nápabe arthritis reumatoide.)





Cásica ni nahuiini' ne cani huaniisi zanda uguuca' gana stobi

xpinni Cristu (Pro. 18:1). Zacá zanda uguuca' gana xcaadxi binni ridagulisa. Zándaca primé gaca nagana para lii gábilu' ca bí'chilu' ne ca bizá'nalu' ni cayácalu'; peru laacabe ziechenécabe lii purti' cayábilu' laacabe xi cayácalu' ne zusihuúnnicabe nadxiicabe lii de guidubi ladxidó'cabe (1 Ped. 1:22). Pa nga nga ni cazaacalu', xiñee qué gábilu' laacabe caquiiñelu' chu' tu chiné lii ra ridagulisaanu, ne rapu' gana chigucheechelu' diidxa' o rápalu' gana guini'lú' xi cayácalu' ya'. Dxandí', zanda gudi'nu xquíxepe' laacabe purti' cayacanécabe laanu, peru cadi naquiiñe' guinábanu laacabe stale cosa ni zándaca qué gápacabe.

Ni naquiiñe' gúninu. Laca laanu nga naquiiñe' ugu'nu gana laanu ora nápanu xixa guendahuará ni qué rianda. Zándaca ma' qué zaní' íquenu jneza ora ma' nuunu triste ne ora ma' qué gápanu stipa. Peru Biblia na: «Espíritu stí' ti hombre nga ni racané laa guni huantar guendananá stí', peru espíritu ni ma' gucaná, tu zanda guni huantar ni» (Pro. 18:14).

Sicarí' guní' Magdalena: «Rune' stipa pur cadi guicá ique' ca guendanagana napa'. Rune' stipa pur chuaa' nayeche' ca dxi rune' sentir galán. Ora guunda' de ca binni ni qué nusaana Dios neca nápaca' ti guendahuará ni qué rianda riguuni gana naa». Yanna, xi zanda guinu

de Izabela ya'. Ni nabé rudii stipa laabe nga gánnabe nadxii Jiobá laabe ne rusisaca laabe. Sicarí' guní'be: «Rune' sentir nabé risaca dxiiña' ni rudiee' Jiobá, napa' tu pur nabane'. Ne laaca cabe' gaca ti cosa nabé sicarú».

Zbigniew guní': «Guendahuará ni napa' racaneni naa cadi gudxiiba' naa ne guzuuba' diidxa', ganna' xii nga ni jneza ne ni cadi jneza ne guiní' ique' ante gune' xiixa, ne gutideladxe' stonda tuuxa de guidubi ladxidua'. Ma' biziide' guieche' ora gune' ni na Jiobá ne cadi guia'ya' laca naa; nga rucaa naa cadi gusaana de guiniise' lu stiidxa' Dios».

Cadi guiaanda' lii nanna Jiobá guirá' ni ma' bi'ní' huantarlu' ne riabe lii. Ne bietenalá-dxi' ndí': «Nanna jneza runi Dios, ne qué zusiaanda irá enda nacha'hui ni huayuni tu ca xpinni purti nadxii tu laa. Huayacané tu laaca ne cayacané ru tu laaca dede yanna» (Heb. 6:10). Cadi gusiaandalu' guirá' ni ma' guní'be chigúni-be para guirá' tu ridxibi laabe: «Qué zusaana laatu ne qué ziaana dxie de acaníá laatu» (Heb. 13:5).

Ne pa chu' ora guni sentirlu' triste la? guní' ique pabiá' galán chigubani binni lu guidxilayú cubi stí' Dios. Mayaca guidú'yanu guirá' ndaaya' ni guedané Reino stí' Dios.

Rietenala'dxu' la?

Ñee ma' biindalu' ca últimu tema ni bedané revista *Torre sti' ni rapa la?*
Yanna biiya' pa zanda guicábilu' ca guendarinabadiidxa' ri':

- **Xii ngue caní' Dios ora gúdxibe tribu sti' Leví: «Naa nga herencia ni raca caber guicalu».**

Guirá' ca tribu sti' Israel gucuaaca' herencia, pero ca levita qué nicaaca' nin ti ndaa layú. Jiobá nga herencia stícabe (Núm. 18:20). Necá qué ñápacabe layú, nabé risaca dxiiña' gúpacabe nezalú Dios. Peru bidii Jiobá guirá' ni biquiñecabe para guibánica. Zacaca nga yanna, ca xpinni Cristu ni runi dxiiña' para guiroobá' xhiiña' Reino zanda guni crea' zápacá' guirá' ni caquiiñeca' (15/9, yaza 7, 8 ne 13).

- **Tuu nga naquiiñe' gusiidi' ca ba'duhuiini' ca de Dios.**

Casi na Biblia, bixhoze ne jñaa ca ba'duhuiini' nga naquiiñe' gúnini (Pro. 1:8; Efe. 6:4). Ma' bihui-nni jma ribeendú xiiñi' binni stale cosa galán ora ru-siidí' bixhózeca' laacá' de Dios (1/10, yaza 6 ne 7).

- **Ximodo zanda gusihuínmi lu' runi respetar- lu' xheelalu' ora guinínelu' laa.**

Ora guiní' xheelatu, «lachuu para ucaa diaga tu, pero cadi nisi undaa ruua si tu xiixa, ne cadi casi ze tu idxiichi tu» (Sant. 1:19). Binni ni nanna gucaadiga, rúnini de guidubi ladxidó'. Ora ma'nuutu stúbitu, cadi guini'tu diidxa' ni guniná xheelatu o ni guchiichi laa. Ora rapasaa ca guendaxheela' respetu la? reeda gaca lídxica' «ti lugar ra guibánica' galán» (Rut 1:9) (1/10, yaza 10 ne 11).

- **Ñee zanda guieche' Jiobá o guiuuba' ladxi-dó' la?**

Salmo 78:40 ne 41 rusihuinni ximodo bñi' sentir Jiobá pur caadxi cosa ni bñi' ca israelita dxique. Hombre bicaa salmo rí' guní': «¡Guirá' ora qué nuzuubacabe stiidxabe lu desiertu que[!]». Ne guní'rube: «Qué nusaanacabe de nucheenécabe Dios». Nga runi, lugar de quixhe íquenu gúnini ni cadi jneza, ne guninanu ladxidó' Dios la? jma galán gúnini ni jneza ne gusiéchenu ladxido'be (1/10, yaza 27).

- **Xi zacané ti xpinni Cristu para ganna pa za-beendú ni galán lu xiixa ni chiguni para chu' na-yeché o pa co'.**

Para gánnanu pa jneza xiixa ni chigúnini ne pa ziula'dxi' Dios ni la? galán guinabadiidxanu laca laanu: Xi zanda gúnini, pabií' tiempu zaquiiñenu ne tu chinenu (15/10, yaza 9 dede 12).

- **Xiñee gudxi Pablo ca xpinni Cristu guiaa-naca' sin guichaganaca'.**

Lu ca diidxa' ni gudxi Pablo ca xpinni Cristu de Corinto, bisihuínne xi guirá' zanda guni ti binni ni cafrú' guichaganá' lu xhiiña' Dios (1 Cor. 7:8). Ora ridúndanu capítulo 13 dede 20 sti' Hechos, ridúyanu guirá' ni bñi' Pablo lu xhiiña' Dios: guzanebe xcaa-dxi misioneru, guyebe stale lugar ra qué huaree-che diidxa' ne gucanebe para bizulú neza binni ridagulisaa ndaaní' stale guidxi. Dxi bñibe xhiiña' Dios bidxaagalube stale guendanagana ni zándaca qué huayuu dxi guidxaagalunu (2 Cor. 11:23-27, 32, 33). Qué ñanda dí' ñúnibe guirá' nga pa ñápa-be xheelabe ne xiiñibe (15/10, yaza 13 dede 15).

- **Ximodo racané relatu ni zeeda lu Prover-bios 7:6-23 laanu para cadi guidúyanu idxa guida, o cosa dxaba'.**

Ca versículo rí' ruzeetecani de ti hombre huiini' ni canazá neza ra nabeza ti gunaa ni rizá zacasi, pero maca nánnabe nabeza gunaa rí' raqué. Despué biciudxi gunaa que laabe chubé ralidxi. Yanna rí' laaca cadi jneza dí' nga chu'lu xiixa yaza sti' Internet ni gucaa laanu guiní' íquenu cosa ni cadi jneza. Galán guinábanu Dios gacané laanu ante guidúyanu xiixa dibuju o foto de laacani (15/11, yaza 9 ne 10).

- **Xi rizídinu de ejemplu sti' hombre ni ye-nudu biní que.**

Lu ejemplu guní' Jesús ca rizídinu ma' qué zúni-nu xhiiña' Jiobá né stale gana, pa chu'lu xizaa pur modo guibáninu «ndaani guidxilayú rí» ne pa guidínu «lugar quite bidxichi» íquenu (Mat. 13:22). Xi zacané laanu para cadi guíábanu lu trampa ca ya'. Chu'lu nayeche' né ni caquiiñesinu ti guibáninu casi ni canazá xquidxi binni ndaaní' guidxilayú malu rí' (15/11, yaza 20).

CA TEMA NI HUAREE LU TORRE STI' NI RAPA IZA 2011

Laaca cá padxí biree ca tema ca

BIBLIA

Para ca hombrehuiini' ne ca dxaapahuini',
1/1, 1/4, 1/7, 1/10

Ñee rusiécheni lii la? 15/5

Gucané Biblia laacabe, 1/7, 1/10

CA TEMA NI BIUUNDA'

Bidxélacabe Mesías, 15/8

Ca binni ni zidi'di' si ndaañi' guidxilayú malu ri',
15/11

Ca diidxa' nacubi ne galán ni nabé caquiiñenu,
15/6

Ca familia ni naca xpinni Cristu naquiiñe' chu'ca'
listu, 15/5

Ca guenda ni ruddi espíritu ruisaca cani Dios,
15/4

Ca xpinni Dios ni bibani dxique' b'ni'ca' ni na
espíritu stibe, 15/12

Cabézacabe Mesías, 15/8

«Cadi gúnilu' ni na xi spiaanilu», 15/11

Cadi gusaana de gatananu cásica gutaná
Jeremías, 15/3

Cani bi'ní ni na espíritu sti' Dios lu primé siglu
ne cani cayuni ni yanna, 15/12

Consejo galán para cani ca'rú' guichaganá'

ne para cani ma' bichaganá', 15/10

Chinándanu ejemplu galán stibe ne cadi gúnilu
ca cosa malu b'niibe, 15/12

Espíritu santi gusané para guyá' guirá' xixé ni
nuu, 15/2

Gacanenu ca hombre ca ti guiniisica' lu stiidxa'
Dios, 15/11

Gacanenu laacabe para guiacacabe dxiiña'

ndaani' xquidxi Dios, 15/11

Gannaxhiñu guendaranu ni jneza de guidubi
ladxido'no, 15/2

Gucá'nanu espíritu sti' binni guidxilayú
ne guicaanu espíritu sti' Dios, 15/3

Gudi'nu lugar gului' espíritu sti' Dios laanu
xi gúminu, 15/4

Guidú'yanu lá Jóbá casi ti lugar ra zanda
guilanu, 15/1

¡Guirutíru' nuu xpiaani' bia' nuu xpiaani' Dios!
(Ro 11), 15/5

Guni adoraru Dios modo riuala'dxi', 15/4

Guni crenu Jóbá yanna purti' mayaca guinitilú
guidxilayú, 15/3

Guni crenu Jóbá, Dios stinu ni riguixhedxi
ladxido'no, 15/10

Guni respetaunu guendaxheela' ti cosa
ni bisiga'de' Dios binni, 15/1

Gúninu stípa para cadi ch'u'dindenenu binni,
15/8

Gusihuinnu nexhenanu, 15/3

Guxó'fienu lu neza sti' Jóbá sin guidxágano,
15/9

Jóbá nga herencia stinu, 15/9

Jóbá qué riuala'dxi' ch'u'dinde binni, 15/8

«Lagapa ca xpinni Dios, cani bisaana be
lu ná tu», 15/6

Laguzuuba' stiidxa' cani runi dxiiña' nadipa'
ládetu, 15/6

«Lauyubi uxooñe tu para iccaa tu ni», 15/9

Naquiiñe' gataná ca familia ni naca xpinni
Cristu, 15/5

Naquiiñe' quixhedxinu «ladxido' cani cayuuba»,
15/10

Ñee cudi'nu lugar gaca Jóbá herencia stinu la?
15/9

Ñee ma' biuulu' lu guendariziila'dxi' sti' Dios la?
15/7

Ñee nanalá'dxunu ni nadxaba' la? 15/2

Ñee ribeendunu ni galán né cani rúninu para
chu'nu nayeche' la? 15/10

Ñee runibiá' jóbá naa la? 15/9

Ñee ruzú'banu stiidxa' Jóbá ora rabi laanu
xi naquiiñe' gúnilu' la? 15/7

Ñee zucaadiágano Jóbá ora quixhená laanu la?
15/7

Quixhe' iquenu gúnilu ni gusisaca Dios, 15/4

Ricanau stípa para cadi guch'e'ne ne para
cadi guire'nu gana, 15/1

Ricanau stípa para tiidinu lu intiaca
guendanagana, 15/1

Rusihuinnu Dios pabíá' nadxii laanu, 15/6

Sanu modo na espíritu ti gápanu guendanabani
ne gatadxi ladxido'no, 15/11

Tuu nga binni jma risaca lu xquendanabánilu',
15/5

Xii' nga guendariziila'dxi' sti' Dios 15/7

Ximodo zanda gu'nu' jma lu xhiñia' Dios laga
ca'ru' guichaganalu', 15/1

Xiñee naquiiñe' chinándanu ni na espíritu
sti' Dios, 15/12

Zacaanu guendanabani ni qué zaluxe
pa chuula'dxi' Dios ni gúnilu, 15/2

Zacané Jóbá laanu pa guni crenu laa de guidubi
ladxido'no, 15/5

CA TESTIGU STI' JEHOVÁ

Bi'ní' ganar ca xpinni Jóbá ti juicu (Rusia), 15/7

Carta ni zeeda de..., 1/4, 1/10

«Gudi'nu de guidubi ladxido'ho» (bueltu),
15/11

Guendaridagulisa'a de chonna gubidxa
«Biseenda' reínu stilu», 1/7

Guendaridagulisa'a ni raca guirá' iza, 15/8

Nápanu razón para chu'nu nayeche' (xquidxi
Dios), 15/3

Ñee rusiándacabe binni pa napa fe la? 1/1

Ni bizeetecabe de dxiiña' guca ti iza, 15/8

Ti revista inglés ni jma nagueenda ziene binni
(Torre sti' ni rapo), 15/7

JESUCRISTU

Ca diidxa' «laca lii gun'ilu' ni», 1/7

Chinándanu Cristu, ti xáique ni qué ruchee, 15/5

Juciú, 1/7

Ñee lu ti cruz guti Jesús la? 1/4

Panda diidxa' riguixhená guca luguiá' Jesucristu,
15/8

Pora bicaacabe Jesús lu yaga, 15/11

JIOBÁ

Bindxiña Dios, 1/4, 1/7, 1/10

Ñee nuu ni raza jma risaca para Dios la? 1/10

Xiñee naquiiñe' guiz'dinu de laabe, 1/4

Xi naquiiñe' guizidicabe (Xiiñi' binni), 1/10

Ñee maca nánnabe zuechee Adán ne Eva la? 1/4

Nuu lá Dios lade dani (Suiza), 15/1

MODO NABANI CA XPINNI CRISTU NE CA GUENDA NI NAQUIIÑE' GÁPACA'

Bisiuhuinni runi respetarlu' xheelálu', 1/10

Cadi gudi'nu lugar quite cani guin'i' iquenu
laanu, 15/3

Cadi gusaana de ch'u'l' nayeche' purti' si
huaralu', 15/12

Cadi gusiá'ndanu cani cusiniisi xiiñi' stubi, 1/1

Guix'í'lunu guendanagana cásica b'i'ni Finehás,
15/9

Guiechenenu xcaadxí binni, 15/10

Guin'i' iquenu xi guirá' huayuni Jóbá pur laanu,
15/1

Guleendú ni galán, 15/6

Guni adoraru Dios né binnilídxinu, 15/8

Gusi'dinu ca xiñiñu guni respetarca' binni, 15/2

«Jma galán nga guzuuba' binni diidxa' que
gutui maní», 15/2

«Lagataná», 15/10

Lagusiidi' ca xiñiñu guibánica' nayá, 1/4

Ñee nahuiñirúcabé para chu'nísacabe la? 15/6

Ñee nánnanu xi caquiiñe' Dios para gului' laanu

paneza chuuña? 15/4

Ñee rusiácanu ca ndaaya' nápanu la? 15/2

Ni gusiiditu ca xiñiñu, 1/1, 1/4, 1/7, 1/10

Ni rabinadidi'xu binni de Biblia o de xixa

guendanagana ni napa, 15/10

Oración, 1/1

Qué ch' dxi gusaananu ca bíchinu ne
ca bizá'nu, 15/3

Ribeendunu ni galán ora rúñinu stípa (guni
adoraru Dios né binnilídxinu), 15/2

Xi racané binni para guindaa

xquendaxheela', 1/4

Ximodo guin'i'ne binni xiñiñu de ora ratané

ti hombre ti gunaa, 1/1

Ximodo iquíñen Internet, 15/8

Ximodo riuu xquendaxheela' binni ora gápacá'
ti ba'duhuiñi', 1/7

NI BIZAACABA BINNI

Cudii Jóbá lugar gune' ni na neca huadide' ra
nagana (M. de Jonge-van den Heuvel), 15/1

Guanda' Biblia guirá' dxi ruidiini stípa naa
(M. Leroy), 15/9

Huacaa' ndaaya' purti' rune' intiica dxiiña' ruddi
xquidxi Dios naa (J. Thompson), 15/12

Ma' bidxela' stale cosa galán (A. Bonno), 15/4

Ni jma rusieche' naa nga gune' ni na Jóbá

(F. Rusk), 15/10

Qué ridixbe' gate', ma' cabeza' guicá'
guendanabani (P. Gatti), 15/7

Ti binnigola nabé nacha'hui' ne nadxii

ca xhamigu laa (J. Barr), 15/5

«Yanna si nga qué rizaya', iperu qué zianadá'
sicarí!» (S. van der Monde), 15/11

XCAADXI TEMA

Biaana Pedru ralidxi ti curtidor, 1/7

Ca biaje ni guca guidubi Guidixilayú, 1/1

Chinécate bastón ne guelaguidi (ca apóstol),
15/3

Dxi ma' qué ch' guendapobre, 1/7

Guca ti milagru para bianda ti hombre, 1/1

Guin'i' binni gadxe' diidxa', 1/1

Jehú ti hombre ni bi'ní' ganar ca binni ni cuacalú

Dios, 15/11

«Jma naquiiñe' gueedanelu' [...] ca pergaminu

que», 15/6

Ñee dxandí' xadxi bibani ca binni ni ruzeete'

Biblia? 1/1

Ñee gupa Abrahán camellu la? 15/6

Ñee ma' nuul' listu para dxi jma risaca

sti' iza ri' la? 1/4

Ñee papa beeda guiana lugar sti' Pedru la?
1/10

Ñee zaree binni gana guibani sin gati la? 1/7

«Ti dama ne stale dama» (Ec 2:8), 15/3

Ti secretu ni zanda guin'ilu', 1/1

Tuu nga cani' Biblia ora ruzeete' lá César, 1/10

Ximodo biuya' ca xáique yu'du' sti' ca jiduú

ni bibani tiempu sti' Jesús binni, 1/10

Ximodo zanda ganna binni guná' nga religión

ni dxandí', 1/10

Xiñee bidixiñiné Moisés ca xiñiñi' Aarón (Le 10:

16-20), 15/2

Zadixña guiasa guirá' que'tu', 1/7